

Aam ro Raa Ykom tna Tiim K'raa Ibrani ro Smot Yesus Ibrani

Yesus tait Ku ro Allah yare

¹ Mam masno ro wia to, Allah ykyas bo k'raa wanu; raa ro Yahudi.* Ait ybis *nabi* wAit mama mkyas bo wAit. Mama mkyas bo k'anu hohos na wanu mam ti aro rau-rau tna mkah iso aro rau-rau ye.

² Menohe mam masno ro tis refo to, Ku rAit Yesus oh mi Raa ro ykyas bo ro mbam k'Allah k'anu. Allah ysy Ku rAit Yesus yfen ayoh msya tabam refo msya bombra beta. Tna Allah ysan bombra weto beta Ku rAit.

³ Bo yase ro Ku rAit to mnan anya msya Yaja yase rAit ye. Soh anu bmat tna bhar Ku rAit Yesus, reto mnan anya msya anu bmat tna bhar Yaja Allah ye. Yesus yhau ybo bombra beta. Ait yno mkah bokyas rAit ro matak toni. Tiwya Ait ysair iso ro yyon iro raa. Tna fo yaut yamo't sawro. Allah tait *Raja* ro yase toni. Tna Yesus yaut yamo hre ysy Ait mam ati ro yatem ati; hroh ro mase toni reto.

* **1:1** Raa wase awya ro ykom aam refo. Menohe anu bhar bwe ait tait raa ro Ibrani ye. Tibyo tiwya ait kro *agama* Yahudi reto tna fo yrok smot Yesus. Tna ykom aam refo k'raa mana wait taro ro smot Yesus ye. Som 'Yahudi' reto mkyas raa mana weto ye, tna mkyas *agama* wana ye. Som 'Ibrani' ja mkyas mai ro raa weto mkyas.

⁴ Feto oh mi anu bhar bwe Yesus tait yase toni yiwer *malaikat* sor. Tna bhar bwe yasom rAit 'Ku ro Allah' reto to, yase toni ye.

⁵ Tiwya Allah yawe:

“Nyō fi Ku aJō oh. Ifo fo Jō tamo Nyō Naja.”

Mazmur 2:7

Tna Allah yawe:

“Jō fo tamo Ait Yaja. Tna Ait tait Ku aJō.”

1 Tawarikh 17:13

Ja Allah ytu *malaikat* aro yawe ku wAit to fee.

⁶ Tna Allah ybis Ku bum rAit yama't tabam refo. Ati reto Allah ybis *malaikat* wAit beta yawe:

“Nmo nbaut Ait.”

Mazmur 97:7

⁷ Tna Allah ykyas *malaikat* yawe:

“Tno *malaikat* woJō mnan fi foos. Tna tno sryan woJō mnan fi tafoh.”

Mazmur 104:4

⁸ Menohe Allah yawe Ku rAit yawe,

“Nyō fi Allah ro nase. Tna namo *Raja* nbo raa msya bombra beta mam snok mam hame wajin. Nyō ja nbo raa woNyō mkah nhaf ro moof ati.

⁹ Bo ro raa mno moof to, Nyō ksoh. Tna bo mkair ro ana mno to, Nyō knait. Feto oh mi Jō tsok Nyō namo *Raja*. Tna ttu *minyak* mam nana aNyō. Tno afo re raa mhar mawe Jō tsok Nyō tna teta Nyō. Tawe, ‘Simaut mase oh; tse Nyō mam hroh ro mase miwer raa roto beta.’ ”

Mazmur 45:7-8

¹⁰ Tna Allah yawe *k'Tuhan* Yesus u yawe,

“*Tuhan*; tiwya tinyi Nyō oh mi nfen tabam refo tna natem aNyō nfen ayoh reto ye.

¹¹ Ayoh msya tabam refo meen marak. Menohe Nyõ kbe nhau hame wajin. Ayoh msya tabam refo meen bose tna mkair, mnán fi ratan ro bose ja mhah hri marak ye.

¹² Meen Nyõ mbewakom ayoh msya tabam refo mnán fi raa mrus ratan ro bose oh, tna beak makus. Tna raa moo ratan ro tna, myum. Meen Nyõ nfen tabam msya ayoh ro tna shauk riryõn ye. Menohe Nyõ nesait ja nros tu. Nyõ nhau moof mnán si mamó snok mam hame wajin.”

Mazmur 102:25-27

¹³ “Nama, hre nsya Jõ mam tajoh ro tatem ati.†
Hre wea oh. Tna raa ro mamó byoh k’Nyõ to, meen tno ana mbtek mam mte. Kbe Nyõ naa nber ana wetó. Tna Nyõ nros natak abyõ ana, nbo ana.”

Mazmur 110:1

Menohe Allah yawe bo fetó *k’ malaikat* wAit fee.

¹⁴ *Malaikat* wetó to, mase mfi *Tuhan* Yesus fee. Allah yfen ana wetó to, mbis ana mno bo wAit, ana to sryan wAit. Tna Ait ybis ana mama mbet raa wAit ro kbe fri riof ro mase.

2

Yesus yerif iso re bkai riof

¹ Yesus tait yase. Watum rAit to matak miwer watum taro sor. Fetó to, bo ro tiwya anu nri k’Ait to, nbo tna kro kakét! Nno be kbe anu ne nmo tit.

² Tiwya Allah ybis *malaikat* wAit mroh mamó mkyas Watum rAit k’Musa. Allah ybis yawe kbe

† **1:13** Yuk reto to hroh ro mase. Yesus hre mam yuk reto to, anu bhar bwe Ait ysya Yaja ybo bombra beta. Tna bombra beta kbe hartu Ait ye.

raa mari Watum rAit reto, tna mbo mno kaket tu oh. Soh raa miwer Watum ro *malaikat* yoo yee k'Musa reto to, Allah yno re bo mama mai k'ana tu oh.

³ Menohe *Tuhan* Yesus yerif iso roto k'anu re bkai riof. Tiwya Yesus ykyas riof ro mase reto k'raa baro wia matim. Tna fo ana ro mesait mari bo ro Ait ykyas reto, me mkyas riof reto k'anu. Soh anu biwana riof ro mase reto to, kbe Allah yoo safo mana reto ymit k'anu tu oh.

⁴ Ja Allah yno bo ro msai sor, tna sair bo ro hnah ye. Tna Allah ysok bouum (*karunia*) aro yoo yuumto k'raa mkah Har rAit ye. Ait ksoh yno bo weto afo re raa mmat tna mhar mawe bokyas ro Yesus to, bokyas ro ati, bokyas ro merif riof ro mase.

Malaikat msya raa

⁵ Wore wo meen raa mkai riof ro tkyas reto to, kbe awya yase tna ybo bombra sor? Allah ysan hroh reto *k'malaikat fee*.

⁶ Au oh mi raa mkyas Allah mawe:

“Amu fo raa ro tabam refo sai. Fyi re Nyō ro nase ja nmat amu ro nku sai? Tna fyi re Nyō nmat ku ramu ye?”

⁷ “Mam masno ro anu raa bhau mam tabam refo fo, *malaikat* ro Allah sor to, mase miwer raa. Nyō noo bobot nee k'raa; tna re bombra taro sor hartu mmat anu raa. Nyō noo bo weto naren raa, mnan fi boren ro ja raa maren.

⁸ Tna Nyō nawe, ‘Mam tabam refo to, aro mase miwer raa fee. Menohe masno refo fo mhau kait fee.’ ”

Mazmur 8:5-7

Bokom reto mawe: “Allah yno raa mase mbo bombra beta.” Menohe anu bmat fetu to fefares.

Malaikat msya Yesus

⁹ Tiwya Yesus yama tabam refo tna yhai. Yhai afo re riof k’raa. Allah yno Yesus yamo raa sai ro yhau mam tabam refo. Yesus yhau mam tabam refo mammo snok *tahun* baro to, yhau ynan fi raa sai, ro ja mase miwer *malaikat* sor fee. Mam tabam refo raa sikowah Ait tna mame yajat. Fetu oh mi Allah teta Ait, yoo yase yee. Tna yno re bombra beta hartu Ait. Allah yatmof raa tibyo ybis fetu. Yatmof raa re bitsre Yesus raa mame riryõn. Tna mafer rau moof k’raa beta.

Yesus ysya raa

¹⁰ Allah ybis Yesus haberek yamo raa, tna yama mam tabam refo. Ybis afo re Yesus yhar bo ro ja mai k’raa to, yhar mnan si, aro mabut fee. Ait bitsre bo ro mkair mbtek mai k’Yesus, tna raa mame yajat. Yesus sair iso ro tna oh meto. Tna yakah raa mawat mammo mam iso reto tna re mkai riof. Allah yno bo moof meto. Allah oh mi yfen tna ybo bombra beta. Yfen afo re bombra beta bibi Ait.

¹¹ Yesus oh mi yoo raa ysan k’Allah re mno bo wAit. Anu bmo ku ro Allah wAit fetu. Tibyo Yesus ysya anu to, Bja sait su. Tibyo bwe Allah tait Bja ranu. Tna Yesus hrenaut anu fee. Ytu anu yawe anu fo yao, yano na to.

¹² Yesus yawe k’Yaja yawe,

“Allah; kbe Jõ tkyas Nyõ nasom aNyõ k’tao, tano na woJõ. Tna tsya ana nji howes nbaut Nyõ.”

Mazmur 22:23

¹³ Tna Yesus yawe,

“Jõ smot Allah toni.”

Tna yawe,

“Jõ thau mam befo tsya raa ro Allah yoo yee k’Jõ.”

Yesaya 8:17-18

¹⁴ Yesus yama tabam refo afo re bo ro kabes yabi (Iblis) yno to rarín beta. Tiwya kabes yabi yatak yno re raa mno iro. Yno wa raa mkai riof oh meto. Menohe Yesus haberek yfi raa. Tna yhau ynan fi raa sai. Yhau tna yhai ynan fi ja raa mhai ye. Yno feto afo re kabes yabi yhau mte. Tiwya kabes yabi yatak yno wa re kbe raa mkai riof fee. Menohe Yesus tait yatak yiwer.

¹⁵ Ja raa beta waa bo kbe meen mhai. Menohe Yesus yno riof k’raa wAit. Tibyo ana waa bo mhai to u fee.

¹⁶ Tiwya Yesus tait yatmof *malaikat* fee. Ait yatmof raa. Tna yhau yban tis anu raa ro Yahudi.

¹⁷ Yawe yban tis anu feto oh mi tiwya Ait yamo raa ynan fi anu. Anu bmo yao yano na. Tiwya Ait yhau mam tabam refo tna ykai bo ro ja raa mkai to ye. Yesus yhar anu kaket re kbe Ait yamo *imam* yase ro ja yatmof anu tna mur-mur yno bo ro Allah yawe. Tna Ait ysan bosan re kbe Allah yyon iro raa to ye.

¹⁸ Tiwya yhau mam tabam refo fares to, raa msya bo ja tko Ait ye, ksoh mawe Ait yno iro. □Menohe yno iro aro fee.□ Tna raa sanet Ait ye. Feto to Ait

yhar yawe anu raa bhau mam tabam refo to, bo min toni, mnan-nan fee. Tibyo Ait yhar bo yban tis anu kaket to ye.

3

Yesus yase yiwer Musa

¹ Taja, tme, tao, tano na; anu bmo raa ro Allah wAit. Tna ytu anu meen bkai roon mam sawro rAit ye. Nnaut Yesus ysa bo ro yno: Ait yamo raabis (*rasul*) ro Allah. Tna yamo *imam* ranu ro yase ye. Tibyo anu bhar bwe Ait oh mi ro yisoh bosmot ranu. Hre nnaut bo reto kaket.

² Tiwya Musa yno bo beta ro Allah ybis. Tna Yesus yno bo beta ro Allah ybis Ait feto ye. Ana mbewok ye mur-mur mno bo ro Allah yawe. Ana bewok mfi sryan ro ja kmot amah ro bobot rait kaket.

³ Mfi bo raa sgi amah ro moof to, kbe raa bibi ait ro ski amah reto. Ana bibi amah ro ait sgi reto fee. Musa yno bo moof. Menohe Yesus yno bo moof toni. Feto kbe anu bibi Yesus yiwer.

⁴ Raa mawat mhar bo sgi amah. Menohe Allah yesait aran yfen bombra beta to.

⁵ Tiwya Musa yno bo ro Allah yawe: Ait murmur ymat raa ro Allah wAit. Tna ykyas bo ro Allah yawe meen mama mrof ye. Yawe meen Raa sait yama ykyas Bokyas ro Ati.

⁶ Menohe *Kristus* tait Allah yare to. Ait yban tis raa ro Allah wAit, tna ymur-mur yno bo ro Allah yawe reto yfi sryan sai fee. Ait oh mi yase ybo raa ro Allah wAit. Soh anu bros tu smot *Tuhan* tna bhau binaut bwe bo ro Ait yawe to, kbe mabo

to. Soh anu bhau bbo bno feto mamō snok mam oon sboh rau to, kbe anu bmo raa wAit tu oh.

Niwana bo ro Allah ykyas k'anū to ma

⁷ Feto to, Har ro *Tuhan* mkyas k'anū mawe, "Nri bo ro Allah yawe!" Tna Allah yawe:

"Mfo wefo to,

⁸ niwana bokyas aJō to ma, mnan fi tii hohos wanu mno ye! Nros tna nri mai aJō! Tiwya raa mana ro Israel mhau mam yuk ro riamo tna sanet Jō. Ana mari bo ro Jō tawe to fee. Ana to, mana mase sai.

⁹ Anu hohos wanu mhau moof mam yuk ro riamo reto *tahun* trion 40. Mhau to mmat bo msai ro Jō tno. Menohe ana moo mhaf wana mee k'Jō fee. Ana sanet Jō □tna mawe, 'Kbe Ait kmo anu to fee! Kbe Ait ymit safo k'anū fee.'□

¹⁰ Au oh meto Jō kmo hohos wanu weto. Tna tawe, 'Ana weto to, ja kro Jō fee. Ana weto wase iso ro Jō terif k'ana.'

¹¹ Feto to Jō kmo ana. Tawe, 'Tiwya Jō tawe k'ana tawe, kbe ana mhau mam wore wo raa hrowyō u fee.' Menohe Jō tto boto tawe, 'Kbe ana mamō mhau mam wore weto fee saut!' "

Mazmur 95:7-11

¹² Taja, tme, tao, tano na; nhau nisoh nhaf wanu afo re kbe anu smot Allah kaket. Kaket anu be anu aro hawe smot Ait. Hawe smot Ait fetō, tibyo haberek nwaar Allah ro yaam to ma.

¹³ Ti wawa to, sobu raa anya, nwe, "Nno iro u to ma! Soh nyō nno iro renti to, kbe nyō besruf nyō ai. Niwana bo ro Allah ykyas k'nyō ma."

¹⁴ Nnaut maut-mroh to ma. Menohe ne smot *Kristus** kaket mnan fi tiwya tinyi anu smot wia to. Soh anu beroh smot Ait mamō snok mam tis sboh rau to, anu fo raa wAit tu oh.

¹⁵ Bokom ro Allah riwai jō tkyas k'anū to mawe:

“Mfo wefo to, niwana bokyas aJō to ma, mnān fi tii hohos wanu mno ye! Nri mai aJō! Tiwya raa mana ro Israel mhau mam yuk ro riamo tna sanet Jō. Ana mari bo ro Jō tawe k'ana fee. Ana to, mana mase sai.”

Mazmur 95:7-8

¹⁶ Awya oh ana weto to? Tkyas raa mana ro Israel. Tii Musa yakah ana frok mbam rabin ro Mesir. Tna Allah ykyas bo k'ana. Menohe ana miwana bokyas rAit. Ana mno Allah kmo meto.

¹⁷ Tii Allah kmo awya? Ait kmo ana ro mno iro weto. Ait kmo ana mamō snok 40 *tahun*. Tna ana weto beta mhai mam yuk ro riamo.

¹⁸ Tiwya Allah yto boto yawe bawya? Ait yto boto yawe, “Raa mana ro Israel to, ja mari bo ro Jō tawe to, fee. Feto tibyo tawe kbe ana mhau mam wore wo tiwya Jō tsi k'ana to fee saut! ‘Wore wo raa hrowyō u fee’, kbe ana mkai fee saut.”

¹⁹ Tna anu bhar bwe ana weto smot Allah fee. Au oh mi ana mamō mhau mam wore weto fee.

4

Raa ro Allah wAit meen hrowyō u fee

* **3:14** *Kristus* to raa masom fee. *Kristus* to gelar ro raa mkyas “Raa ro Allah ysok mkah bo yoo riof ro mase yee k'raa.” Mai ro Ibrani mawe *Mesias*, tna mai ro Yunani raa mawe *Kristus*.

¹ Tiwya Allah ykyas wore wo meen raa wAit hrowyõ u fee. Tna bo ro ysi reto to, Ait ynaut tna ybo fares. Feto to, nisoH anu kaket re kbe anu beta nkai bo ro Ait ysi reto.

² Tiwya raa mkyas Watum ro Allah k'raa mana ro Israel. Ana mari bokyas reto, menohe mse mam mhaf wana fee. Tibyo bokyas reto mafer marak k'ana weto. Tna anu to, raa mkyas Bokyas Moof [ro *Kristus(Injil)*] k'anu ye. Feto to smot Ait tna nse bokyas rAit mam anu nhaf wanu.

³ Anu ro smot Yesus tibyo nbo Bokyas Moof reto kaket to, anu oh mi kbe nmo nhau mam wore wo raa wAit hrowyõ u fee meto. Tiwya Allah yawe,

“Jõ tkyas wore wo kbe raa hrowyõ u fee. Menohe Jõ kmo raa ro Israel toni. Tibyo tbo boto tawe, ‘Kbe ana mammo mhau mam wore weto, fee saut!’ ”

Mazmur 95:11

Allah yfen tabam refo tna siwyan wore wo raa wAit meen hrowyõ u fee ye. Siwyan mkak oh. Menohe raa ro Israel weto tii mkai wore weto fee.

⁴ Bokom ro Allah mawe:

“Ti ro ntamam Allah yfen bombra ro tabam refo to beta mkak. Tna ti ro ngkrema to, Ait yitsre bo ro yno beta. Ayõ ro Allah hrowyõ fee oh meto.”

Kejadian 2:2

⁵ Nnaut nwe Bokom ro Allah riwai mkyas ‘wore wo raa wAit hrowyõ u fee’ mawe: “Kbe ana mammo mhau mam wore weto fee saut!”

⁶ Raa mana ro Israel tiwya mari bokyas ro moof sau wia, menohe ana mbo mno bokyas reto fee.

Feto tibyo ana weto mkai wore weto fee. Anu bhar bwe wore wo Allah siwyan reto to, mhau fares. Kbe raa roto taro mkai wore weto.

⁷ Tiwya raa mana ro Israel mamō mhau mam wore weto fee. Tibyo Allah ysok ti sau naut yawe 'mfo refo'. Masno aro rau firwas tna Daud ykyas yawe:

“ ‘Mfo refo’ to, nros tna nri mai ro Allah. Niwana bokyas rAit to ma!”

Mazmur 95:7-8

⁸ Tiwya Yosua yakah raa ro Israel mamō't tabam ro Kanaan. Menohe mbam Bokom riwai reto to, anu bhar bwe bo ro Yosua yno reto to mabut fares. Tna masno ro kbe raa 'hrowyō u fee' to, sboh fefares. Mabu rau mhau fares. Bhar bwe far-far mam Bokom ro Allah reto mkyas masno roto.

⁹ Feto to anu bhar bwe raa ro Allah wAit meen mhaf mse bo ro Ait yawe reto. Masno ro ykyas reto to, mnān ayō ro ja raa ntmoħ tna hrowyō mno bo wana to fee. Mnān ayō ro ngkrema to,

¹⁰ tiwya Allah yitsre bo ro yno beta. Ayō reto to ayō ro Ait hrowyō u fee ye. Allah siwyan wore sau re kbe meen raa wAit hrowyō u fee ye. Awya ro meen yhaf yse wore wo Allah siwyan reto to, kbe yitsre bo rait ro yno beta ye.

¹¹ Nma, anu tomer re bkai wore weto. Tiwya raa mana ro Israel mari bo ro Allah yawe fee. Tibyo mkai fee. Niwana Allah mnān fi ana weto to ma, be kbe anu aro nkai wore weto fee ye.

¹² Bokyas ro Allah to bo ro mawyōs, bo ro matak toni. Bokyas ro Allah mhar raa mhaf mato wana ye tna mhar bombra beta ro raa mnaut mam makit, srau wana to ye. Bokyas ro Allah

to mfi tfo ro maan toni: Mnan tfo ro mame raa mhaf mato ye, tna mitwat raa makor msya mtai bo ye. Tna Bokyas ro Allah ja mmat sas bo ro raa mnaut mam srau wana tna mmat sas bo ro raa makit saim mno ye.

¹³ Tiwya tinyi Allah yfen bombra beta ro mhau mam tabam refo tna mam ayoh skes to ye. Allah ymat tna yhar bombra beta. Bo bawya sai ro raa mno to, Allah yasu ymat. Ymat bo beta ro ja raa mmyõt wai to ye. Meen mam wore Ait yros susai ytu srah yari to, anu raa kbe bros bkyas safo wanu beta ro anu bno.

Yesus tait Iman ranu ro yase

¹⁴ Yesus tait Ku ro Allah yare. Ait yamo *imam* ranu ro yase. Ait yase re yamo ykyas boyoh wanu k'Allah mam sawro rAit. Feto to nma, anu bros btak tna bbo bosmot ranu reto kaket!

¹⁵ *Imam* ranu ro yase retait yhar yawe anu raa sai. Ait yhar yawe anu raa bhau mam tabam refo to, bo min toni, mnan-nan fee. Tiwya yesait yamo raa tna raa tko mawe Ait yno iro. Raa sanet Ait, tna bo ro samyoh mbtek mai k'Ait ye. Menohe Ait yno iro fee.

¹⁶ Yesus yhar yawe ja raa matak mnan fee. Feto kbe Ait ykyas anu k'Allah kaket ye. Nma bmo bo k'Ait. Waa ma. Anu bhar bwe Allah ja yatmof anu. Wore wo bombra sor mama mai anu to, anu bhar bwe Yesus yban tis anu. Anu bhar bwe Allah ksoh yoo tak rAit yee k'anu.

5

¹ □Tiwya ati ro Yesus yama fefares to, □ja Allah ysok raa sait yawe yamo *imam* ro yase mam

agama Yahudi. Tna raa ro yamo *imam* ro yase retait oh mi yayoh boyoh raa k'Allah. Ja soh raa ksoh mayoh asik mawat k'Allah to, ana moo bosan mee *k'imam*. Tna kbe *iman* ysan bo weto k'Allah. Tna *imam* retait ja ysan bo roto k'Allah ye. Ysan re Ait kmo raa ro mno iro to fee ye.*

² *Imam* ro yase, ait yesait raa sai. Tna yhar yawe raa taro wase bo, tna bosmot rana to matak fee, tna mno iro ye. Tna *imam* retait yhaf sneh yban ana. Yhar yawe ti aro bosmot rait yesait matak fee ye, tna yesait yno iro ye. Feto tibyo ait yhaf sneh yban tis ana ye.

³ Au oh mi ait ja ktan kak tna yoo ysan mkah ait yesait wia matim. Ysan k'Allah re yake safo wait ro yno to ye. Tna ait yoo bo ro raa roto makah mamoo mee k'ait, yoo ysan k'Allah. Ysan re yake safo wana ro mno to ye.

⁴ Raa aro ja yesait ysok ait ai yamo *imam* ro yase to fee. Allah yesait ysok tna ytu *imam* sait yawe yamo *imam* ro yase. Ja Allah ysok tna ytu raa sait mnan tiwya ysok Harun yawe yamo *imam* ro yase to.

⁵ Feto ye *Kristus* tubat Ait yesait fee. Ait ysok Ait ai yamo *imam* ro yase to fee. Allah yesait yawe,
 “Nyõ fi Ku aJõ. Mfo refo tamo Nyõ Naja.”

Mazmur 2:7

⁶ Tna Allah yawe,
 “Tawe Nyõ namo *imam* mamyyot Melkisedek.†

* **5:1** Ifo yoyo ait yoo kak tna ktan tna mko ysan to ye. † **5:6** Kejadian 14:18mkyas raa sait yasom Melkisedek. Tiwya ait yamo *raja mam kota Salem* (Yerusalem) tna yamo *imam* ye. Nmat Ibrani 7:2 ye.

Nyõ namo *imam* mammo snok mam hame wajin.”

Mazmur 110:4

⁷ Ati ro Yesus yhau mam tabam refo fares to, Ait skabuk yayoh bo k’Yaja Allah. Ykyas bo k’Yaja ykyas fari to, yawia tna yukan mbtek. Ait yhar yawe Yaja yatak re yno riof k’Ait. Yesus ja yasu heyut yari bo ro Allah yawe. Tibyo Allah yari bo ro Yesus skabuk.

⁸ Yesus tait Ku ro Allah yare, menohe bo ro mkair mno Ait ye. Tna bo ro mkair weto to, mno re Ait yari bo ro Allah yawe to, ybo yno kaket.

⁹ Bo ro mkair mai k’Yesus tibyo raa mame yajat. Allah ybis afo re Yesus yhar bo ro ja mai k’raa to, yhar mnan si. Yhar oh tna ysair iso re kbe raa mammo mkai riof. Awya sai ro yari bokyas rAit, tna ybo yno to, kbe meen yhau hame wajin.

¹⁰ Tna Allah ysok Yesus yawe yamo *imam* ro yase mamyt Melkisedek. Allah yawe Yesus hre mam yuk ro mase.

Haberek kbor k’Yesus ma

¹¹ Jõ tawe tkyas bo riwai reto msis k’anu fares. Menohe anu nkit mbin, ja srau fee. Tna re jõ tifra sneh betoo bo reto rere sai k’anu.

¹² Anu smot Yesus ooh-oh: Snyi firwas snyi tna *tahun* firwas *tahun* oh. Menohe anu nhar bosmot ranu kaket fefares. Nhar kaket fefares tna re nkyas bo refo k’raa kaket fefares ye. Rau ro moof to, raa mama mbetoo bosmot ranu, maja ro tinyi rau u k’anu, mkyas rere, afo re anu nesait srau. Feto to jõ tkyas maja ro msai aro k’anu fee. Anu nfi ku mees ro mait sis sai fares. Anu ntak niit boit nfi raa mabi to fefares.

¹³ Awya ro yait sis sai to, yfi ku mees fares. Tibyo wase bosmot ranu maja rau fares ye. Yhar bo yno bo ro moof fefares ye.

¹⁴ Maja ro msai to mnan fi boit ro matak. Raa ro ja beroh mbo mno bo ro moof to, mrok makit maan, mrok mhar bo mmat sas bombra beta. Mmat sas tibyo mhar bo ro moof re mno. Tna mhar bo ro mkair re mno fee.

6

¹⁻² Watum ro *Kristus*, maja taro ro mnan-nan to, bo weto anu nhar oh. Feto nma, anu bkyas bokyas refo maja baro ro samyoh fares, re kbe anu brok btak. Watum rAit ro anu nhar oh mefo: -Nashana tna nno bo ro mkair to ma. Raa ro mno bo ro mkair to, kbe mkai riof to fee.

-Smot Allah.

-Raa *baptis* anu.

-Nmo no k'raabis ro *Tuhan* re ana moo matem mtor k'anu abyõ tna skabuk anu.

-Raa ro smot Yesus tna mhai to, kbe meen mrok masen.

-Kbe meen Allah yoo safo mana ymit k'raa. Tna bo ro yawe reto to, meen mabo yum.

Tiwyra raa mkyas bo weto beta k'anu re nhar oh. Feto to nno bo mnan fi ku mees u to ma.

³ Anu bkyas bo weto oh. Tna soh Allah ksoh ybis to, tawe kbe anu bkyas bo ro mase renti.

⁴ Raa taro tiwyra mhau mam wore wo mamur menohe ana mamõ mhau mam wore wo maah. Ana weto tiwyra moo bouum ro Allah yoo yee k'ana oh. Tna Har rAit mjin mam mhaf wana oh.

⁵ Tna mhar mawe bo ro Allah yawe to, moof toni. Tna ana mhar tak ro Allah ye tna minaut sawro ro Ait siwyan k'ana.

⁶ Tna fo, soh ana weto haberek kbor to, ana mesait mame Yesus muhrin ro ewok u. Tibyo mno re raa miwana Ait tna sret Ait masah. Soh ana weto mamō tit tna miyak *Tuhan* Yesus to, kbe ana me mashana u fee saut.

⁷ Oom mais mroh mame tabam beta. Tabam taro to raa mkah tna tabam reto tufrok mafer mawat k'raa ro mkah. Tibyo Allah yno bo moof k'tabam reto. Tabam reto to mnān fi raa ro moo boum ro mbam Allah tibyo mno bo ro moof.

⁸ Menohe tabam roto taro to, tufrok abumun msya bo hyoh sai. Tibyo kbe Allah yto tabam reto. Meen tis rau to, Ait yuus tabam reto. Tabam reto to mnān fi raa ro moo boum ro mbam Allah menohe me mno bo ro moof fee.

Nhau ste bo ro meen Allah yuumto k'anu

⁹ Tafoh na wojō; jō tkyas bo wefo menohe jō tnaut tawe anu wefo kbe nhaf nse bo ro moof. Anu ja tufrok mafer ro mkair to fee. Tnaut tawe anu nmo mam iso ro meen nkai riof.

¹⁰ Ati ro Allah ytu srah yari to, ja yno kaket. Tna kbe Ait ynaut bombra ro moof ja anu nno. Ja anu natmof raa wAit to. Tna Allah ynaut yawe nno fetō to, mnān anya msya anu nno bo moof wetō k'Ait yesait ye. Nno fetō yhar yawe anu natmof Ait ye.

¹¹ Amu ksoh nwe anu nhau nno bo wetō mamō snok mam wore anu nhai. Beroh nno renti afo re meen anu nkai riof ro mbam k'Allah. Kbe meen anu nkai bo ro anu nwof tna nhaf ninaut fares reto: Bo moof ro meen Allah yuumto k'anu.

¹² Anu nhar bosì ro Allah ysi k'anu, raa wAit. Feto to haweboh ma. Beroh nno bo ro moof mnan fi raa wAit ro matim wia. Nnaut raa wAit ro tiwya smot Allah: Tii ana weto mhau mwof bo ro Allah ysi k'ana. Ana mwof kait tna beroh smot Allah matak. Tibyo mkai.

¹³ Nnaut: Tiwya Allah ysi bosì k'Abraham. Ati ro ysi bo reto, Ait yto boto ye. Allah yto boto to, ytom yasom rAit ai. Allah tait Raa ro yase. Raa roto aro mase miwer Ait fee. Feto to ysi bosì reto to, tna yto boto mkah yasom rAit ai.

¹⁴ Allah yawe,

“Kbe Jõ tno bo ro moof k'nyõ. Tna meen tno nyõ nabe ku renti msis-sas.”

Kejadian 22:16-17

¹⁵ Tibyo Abraham yhau to, beroh ste bo ro Allah ysi reto. Ait hrowyõ fee. Tna mabo.

¹⁶ Soh raa sait yto boto to, ja ytom raa sait yasom ro yase yiwrek ait. Tna ait ro yase tait yhaf sau yawe kbe bo reto mabo ye. Ja raa mari fetò mawe, “Kbe ait ybo yno tu oh!” Kbe raa mnaut maut-mroh bokyas rait reto fee. Kbe raa besboh bokyas rait fee.

¹⁷ Allah ksoh yawe ku renti ro Abraham wait weto, kbe mhar mawe Ait tait Raa ro yros tu, susu fee. Afo re ana mhar mawe bo ro Ait ysi k'ana weto to, kbe meen yno tu oh. Feto to ykyas sai fee, ysi bo sai fee; Ait yto boto ye.

¹⁸ Ait ysi bosì ye. Tna Ait yto boto ye. Bo ewok weto to, kbe mhau bau. Allah wase bo sioh to. Anu ro bsam wai k'Ait oh to, anu bhaf binaut bwe bo ro Ait tiwya ysi k'anu weto to, kbe yno

tu oh. Bohar reto to mban anu tis, misoh anu bhaf wanu. Tibyo waa ma.

19-20 Anu bhaf binaut bo ro meen mama k'anu mbam Allah. Meen anu bhaf bse tu oh. Allah sorni bo fee saut. Bo ro yawe yno to, anu bbo matak. Soh anu bnaut bo moof weto to, kbe anu bros btak; susu fee. Bo moof weto to mnan si *jangkar* ro ja raa mbeak mam aya tna *kapal* reto mros matak. Yesus yban tis anu afo re anu bros btak ye. Ait yase re kbe yamo ykyas boyoh wanu k'Allah. Ait yhau su ysyia Allah. Yhau su ysyia Allah ynan fi *imam* yase ro Yahudi. Tiwya soh *imam* retait yamo yo k'Allah to, ait twok mam yuk ro mbau.* Yesus fi yamo *imam* ranu ro yase, ynan Melkisedek. Yamo *imam* mammo snok mam hame wajin, meen yhai fee. Tna Yesus fi yamo wia yatim ykyas boyoh wanu k'Allah.

7

Melkisedek

¹ Tiwya Melkisedek yamo *raja* ro ybo tabam ro Salem. Ait yhar yawe Allah tait Raa ro yase toni. Tna yamo *imam* rAit. Tii Abraham yamo yafa ysyia *raja* makin sor. Ait yros yatak abyō tna byoh weto to mhau mte. □Tna Abraham ytak bo wana.□ Ati ro hah ye yamo't tabam rait to,

* **6:19-20** Mam Samu ro Allah ro tiwya mhau mam Yerusalem to, hawar sau to mbau toni. Tna bo yase ro Allah rAit mhau mam beto. Tna *horden* sau nkro burut wa yuk ro mbau toni reto. Raa ro Ibrani mesait mammo mo k'Allah fee. Ja *imam* rana ro yase sait aran twok mam hawar ro mbau toni reto.

raja Melkisedek yama ytar ait. Tna Melkisedek skabuk re Allah yno bo ro moof k'Abraham.

² Tna Abraham yoo bo ro taa ytak mbam *raja* makin msya raa wana weto. Yoo hariyah (*sepersepuh*) mbam bo weto beta to, yee k'Melkisedek. Som Melkisedek to, maja rau to '*raja* ro ybo raa wait tait, yhaf moof ati, ro wase bo yber safo.' Tna bi ait tait *raja* ro ybo tabam ro Salem ye.* Som Salem reto, maja rau to 'iranya moof'. Feto to ait *raja* ro yisohiranya moof to ye.

³ Melkisedek tait, raa mhar yaja msya yme bo fee. Mhar hohos wait fee ye. *Tahun* ro fnya mabe Ait to, anu wase ye. Tna soh ait yhai oh to, anu wase ye. Ait tait ynan fi Ku ro Allah yare. Ait yamo *imam* mammo snok mam hame wajin.

⁴ Bi Melkisedek fi raa ro yase toni. Tiwya Abraham yoo bo hariyah (*sepersepuh*) mbam bosatoh rait ro riwai ytak to, yee k'Melkisedek. Feto anu bhar bwe bi Melkisedek fi yase yiwer Abraham, hohos ranu ro yasom.

⁵ Watum ro *agama* ranu mkyas ku renti ro mbam bi Lewi. Ana ro mammo *imam* mam *agama* ro Yahudi to, Watum reto mkyas mawe, "Ana weto moo bosan raa ro Yahudi ja moo msan k'ana. Ana moo bo hariyah (*sepersepuh*) mbam raa wana sor; ebokmi ana weto to ku renti ro Abraham wait ye."

⁶ Menohe Melkisedek, ait ku renti ro bi Lewi fee. Feto Abraham yoo bo wait hariyah, yee

7:1 Kejadian 14:17-20. * **7:2** Raa mnaut mawe Salem reto *kota* ro Yerusalem, som rau ro tinyi. Melkisedek tait ybo raa wait to mkah yhaf ro moof toni, mnan fi Allah ybo raa wAit mkah yhaf ro moof toni ye.

k'Melkisedek yno fyi? Tiwya Allah ysi bosu k'Abraham. Feto anu bhar bwe Abraham tait raa ro ati ye. Menohe bi Melkisedek fi yase yiwer Abraham. Tibyo Melkisedek oh mi skabuk Allah re yno bo ro moof k'Abraham.

⁷ Anu bhar bwe raa ro yase mi ja skabuk re Allah yno bo ro moof k'raa ro kinyah.

⁸ Raa ro mamu *imam* mam *agama* Yahudi to raa sei sai. Kbe mhai ye. Raa wetu ja moo bo hariyah mbam raa anya sor. Menohe raa mawe Melkisedek fi yhai fee. Ait yhau yroon.

⁹⁻¹⁰ Ati ro Melkisedek yama ytar Abraham to, Lewi yarak fares. Hohos rait mabe ait fefares. Menohe raa mawe, "Ati ro Abraham ysan bo k'Melkisedek to, reto mnan fi *imam* Lewi yesait yoo bo rait hariyah yee. Mawe mnan fi Abraham msya ku renti Lewi ro yabe fefares, msan bo reto su. Yoo yee ebokfi ja raa msan bo k'Lewi."

Yesus yamo imam ro yase toni

¹¹ Ati ro Allah yoo Watum ro Musa yee to, Ait ysok *imam* mbam ku renti ro Lewi msya bi Harun.[†] Ana wetu mbo raa afo re ana mari kro Watum ro Musa. Menohe *imam* wetu matak misohiranya raa msya Allah to fee. Feto to, Allah ybis *imam* roto taro sait yama. Ybis *imam* ro ynan fi Melkisedek yama.

¹² *Imam* sor ro mnan fi Harun mkyas Watum ro Musa. Tna mfo wefo Raa roto taro sait shauk yuk ro mase reto. Ait tait yatak yisohiranya raa

[†] **7:11** Bi Harun tait ku renti sait ybam bi Lewi. Ait tait Musa yao, tna yamo *imam* mam *agama* Yahudi ye. *Imam* wetu to watum raa afo re ana mari kro Watum ro Musa.

msya Allah. Tibyo Watum rAit shauk Watum ro Musa ye.

¹³⁻¹⁴ Bokom ro Allah mkyas Yesus. Yesus hohos wAit weto to, ku renti ro Lewi fee. Ait ybam ku renti ro Yehuda. Tna Watum ro Musa mkyas mawe ku renti ro Yehuda ja mammo *imam* fee. Ana ja moo bosan raa tna msan k'Allah mam Samu rAit ye fee.

¹⁵ Mabo oh. *Imam* roto sait yama. Tna Ait ynan fi Melkisedek. Yama tibyo bo ro riwai tkyas to, mfo refo anu srau bhar kakat.

¹⁶ *Kristus* yamo *imam* fyi? Ait tait Ku renti bi Lewi fee. Feto yamo *imam* mkah tak ro Watum *agama* Yahudi ranu to, fee. Allah ysok Ait yamo *imam* mkah yatak rAit. Tak rAit reto oh mi yno Ait yhau yroon ye. Meen yhai fee.

¹⁷ Allah yawe k'Yesus yawe,
 "Tawe Nyõ namo *imam* mamyot Melkisedek.
 Nyõ namo *imam* mammo snok meen hame wajin."

Kejadian 14:18

¹⁸ Watum ro Musa mkyas mato ro *imam* tna mkyas mato mawat roto taro sor. Mato ro *imam* reto, bose oh. Matak fee. Mafer marak. Tibyo anu sorni makus oh.

¹⁹ Watum reto to matak re misoh bo aro kakat to fee. Feto to Allah ysair iso ro tna. Iso reto moof miwer. Tibyo anu bhau binaut bwe soh anu kro iso ro tna reto kbe anu bmo biranya bsya Allah.

²⁰ Ati ro Allah yawe Yesus yamo *imam* to, Ait yto boto. Menohe ati ro raa roto mammo *imam* to, Allah yto boto feto fee.

21 Yawe k'Yesus yesait aran yawe,

“Nyõ namo *imam* mammo snok mam hame wajin.
 Jõ fi *Tuhan* Allah. Tawe feto tna tbo matak
 tu oh. Kbe tnaut maut-mroh fee.”

Mazmur 110:4

22 Allah ysi bosì ro tna sau tna yto boto. Kbe ybo
 matak. Yawe feto tibyo anu bhar bwe Yesus yno
 bo moof toni miwer bosì ro tiwya tinyi.

23 Mamyot bosì ro tiwya tinyi reto to, ku renti ro
 Lewi to, mabo mawat mammo *imam* oh. Menohe
 ana weto mabi tna mhai. Mhai tna ku wana
 masen mammo *imam* ro Yahudi riryõn. *Imam*
 weto sait yhau tibyo fee.

24 Menohe Yesus yhau yroon. Feto to Ait tait
imam ro meen yhai fee.

25 Yamo *imam* ro meen yhau hame wajin. Ait
 yayoh bobyoh wanu k'Allah. Feto to, raa ro
 mawe mammo kut-kut msya Allah to, Yesus yatak
 re yakah ana mammo mo k'Allah. Tna yatak yno
 riof k'ana weto mammo snok mam hame wajin ye.

26 Yesus yamo *imam* ranu ro yase to, yban tis
 anu to, yno bo mnan si. Ait yhau yno bo ro Allah
 wAit sai. Yesus tait Raa ro ja wase bo yber safo.
 Ait yato mboh. Mfo refo Ait yhau su ysya raa ro
 mno iro to u fee. Allah yno Yesus yase toni. Yoo
 Ait yse hre mam sawro rAit.

27 Yesus tait ynan fi *imam* ro mase roto taro sor
 fee. Ait yoo kak tna ktan re ysan k'Allah to fee.
Imam ro mase roto taro to, ti wawa ja ana msan
 bosan. Ti wawa ana msan bosan mkah iro wana
 mesait to tinyi. Tna fo ana msan bosan mkah iro
 raa ye. Ja mno bo reto yoyo. Menohe ati ro Yesus
 ysan yetsu rAit yesait to, ysan mun sau aran sai.

Feto tna re yyon iro raa mamno snok mam hame wajin.

²⁸ Watum ro tinyi reto mkyas mawe raa sei sai mamno *imam* ro yase. Menohe anu raa sai fo, btak fee; ja bno iro sai. Tna ati ro Allah yawe *Kristus* yamo *Imam* ranu ro yase to, Ait yto boto. Allah ysok Ku rAit yawe yamo *Imam*. Allah yno Ku rAit yamo *Imam* ro ja yno bo ro moof toni yum.

8

Yesus oh mi yase ybo Bosi ro Tna

¹ Jō tkyas k'anu tawe Yesus tait yamo *Imam* ranu ro yase. Reto to Ait yno bo ro moof toni. Allah tait *Raja* ro yase toni, tna Yesus yaut yamo hre ysya Ait mam ati ro yatem ati; hroh ro mase toni reto.

² Mam tno Ait yhau yno bo mam yuk ro mbau. Yuk reto *Tuhan* yesait yfen. Mnan anya msya Sbyah ro *Tuhan* raa mtor mam tabam refo to fee.

³ Raa ro mamno *imam* mase to, ja moo bo ro raa mama mee k'ana, tna msan bosan weto k'Allah. Ja soh raa ksoh mayoh asik mawat k'Allah, ana moo bo mee *k'imam*. Tna kbe ait ysan bosan weto k'Allah. Tna *imam* retait ja ysan bosan mkah iro raa to ye. Tna Yesus, ro yamo *imam* ranu ro yase to, ysan bo bawya?

⁴ Tii yhau mam tabam refo to, Ait yamo *imam* fee. Raa ro mamno *imam* makin mam *agama* Yahudi ja mhau oh. Tna ana oh mi mhau msan bo k'Allah mamyt Watum ro *agama* ranu mbis mawe.

⁵ (Tiwya Allah yroh yama yo k'Musa mam atu sau. Yroh yama tna ybis Musa ytor Sbyah

mam tabam refo. Ybis yawe, “Sbyah refo to, ntor kaket: Sgi mnan fi maja ro Jō terif k’nyō. Sgi Sbyah reto kro maja mnan fi samu aJō ro mhau mam sawro.” Tibyo Musa sgi Sbyah ro skabuk reto.) Feto tna mbam tii reto to, *imam* ro Yahudi ja mno bo wana mam Sbyah reto. Sbyah reto kebet sai mnan anya msya samu ro *Tuhan* rAit. Menohe samu ro *Tuhan* rAit, ro mhau mam sawro rAit to, samu rAit ro ati.

⁶ Imam weto ja mno bo mamyot Watum ro Musa; Watum ro tii bose. Menohe Allah ysi yawe meen yno bo moof k’anu miwer bo ro tiwya ysi yawe yno k’hohos wanu. Feto to, Bosi ro Tna reto moof miwer Watum tii bose reto. Yesus ybo Bosi ro Tna reto, tibyo yros susai ykyas bo ysy Allah tna ysa raa. Tibyo bo ro Ait yno to, moof miwer bo ro *imam* weto mno.

⁷ Watum tii bose reto to moof mnan si fee. Feto tibyo Allah saso bo ro tna aro; bosu ro moof miwer, tna re kbe shauk Watum tii bose reto.

⁸ Tiwya tinyi *nabi* Yeremia ykom bo ro Allah yawe k’raa ro Yahudi. Ait yawe ana mno bo ro mkair, yawe,

“Kbe meen Jō tkyas bosu ro tna k’raa ro Israel.

Kbe meen Jō tkyas bosu ro tna k’raa ro Yehuda.*

⁹ Bosu ro tna refo fo mnan bosu ro tiwya tkyas k’hohos wana to fee. Tiwya Jō takah ana frok

8:5 Keluaran 25:40. * **8:8** Som Ibrani, msya Yahudi, Yehuda msya raa ro Israel to, masom trion jiiit weto mkyas raa mana sau; ja mnan anya sai. Tiwya tinyi, ati ro *nabi* Yeremia mkyas bokyas refo fo, raa ro Yahudi beta mhau su fee: Ku be ro mbam bi Yehuda to mhau hayah. Tna miranya msya raa ro Yahudi taro fee.

mbam tabam ro Mesir. Tna Jō tkyas watum k'ana. Menohe ana mari bo ro tsi k'ana weto mbo mno fee. Feto tibyo Jō haberek kbor.

¹⁰ Kbe meen Jō tkyas bosì ro tna k'raa ro Yahudi. Meen tno re watum ajō mhau k'ana makit msya mhaf wana yum. Kbe ana mbaut Jō tesait aran. Kbe ana mbaut bo ro tabam u fee. Tna ana mamō raa mana wōjō.

¹¹ Tna ati reto to, raa mabi msya kukek bo beta kbe mhar Jō kaket. Feto kbe raa sait watum yafoh wait u fee. Yawe, 'Saso *Tuhan*, tna kbe nhar Ait kaket!' Kbe yawe feto u fee. Mam wore weto to, kbe raa beta mhar Jō kaket oh: Raa ro mase ye, msya raa ro kinyah ye.

¹² Bo ro ana mno mkair to, kbe tyon beta. Mnan fi kbe Jō sorni iro wana ro mno to makus."

Yeremia 31:31-34

¹³ Allah yawe bosì reto to 'Bosì ro Tna'. Yawe feto to, yno shauk Watum ro Musa, 'Bosì ro Tinyi' reto. Bosì tii bōse reto to, kbe Allah yirenti makus sai.

9

Yuk ro Mbau

¹ Bosì ro tinyi reto to, Allah ysi bo k'raa ro Yahudi. Ykyas bo maja ro ana mama mo k'Ait, tna skabuk Ait. Tna ykyas Sbyah sau mam tabam refo, msya hawar rau ro mbau tna Allah yesait aran twok.

² Tiwya tinyi raa mtor Sbyah reto. Sbyah reto to, mato rau to, hawar trion ewok: Mam hawar ro tinyi reto, raa moo sawe ro mara sau mse mros, msya ambar sau. Tna *roti* ro mbau to, raa

moo mse abyõ mam ambar reto. Hawar reto to, raa mtu mawe, 'yuk ro mbau'.

³ Tna raa hero *horden* sau re burut wa hawar ro ewok reto. Tna hawar refo fo raa mtu mawe, 'yuk ro mbau toni'.

⁴ Mam hawar reto to, wohat (*mezbah*) ro maku sau mhau. Mam wohat reto to, *imam* ro yase yko bo ro sawer. Wohat reto to, raa moo *emas* mfen. Tna mam Sbyah hawar mato ye to, *peti perjanjian** mhau ye. *Peti* reto to, raa mfen mkah ara tna moo *emas* minin kait. Bo trion tuuf mhau mam *peti* reto mato: Ro sau to boit *manna* ro tiwya Allah yoo yee k'raa ro Yahudi mait. *Manna* reto mhau mam baah (*bulibuli*) sau ro *emas*. Tna ro ewok, armuk ro Harun. Armuk reto tiwya tafuf frok. Tna ro tuuf to, raa mse bosu ro bosa reto tiwya raa mkom mam fraa ye.†

⁵ Mam *peti* reto abyõ rau to, raa moo *emas* mfen *kerub* mabo ewok.‡ Ewok wetu mros kmot *peti* reto. (*Kerub* wetu to, raa mfen re *imam* yase ymat tna yhar yawe bo yase ro Allah rAit mhau mam wetu.) *Kerub* wetu maim wana mburut masa ro ja raa muut *peti* reto. Raa mtu bokait reto mawe, 'Yuk refo fo Allah yyon iro raa'. Mam bokom ro mabuf refo fo, jõ betoo maja wau beta

9:4 Keluaran 30:1-6. * **9:4** Keluaran 25:10-16 Kotak refo tiwya Allah ybis Musa yfen mkah ara. '*Peti perjanjian*' refo fret bo mawe: 1. Allah yatam raa wAit. 2. Bo ro bi Ait yawe to, meen Ait yno tu oh. **9:4** Keluaran 16:33. **9:4** Bilangan 17:8-10. † **9:4** Ulangan 10:3-5 Tiwya Allah ykyas watum rait k'Musa tna ykom mam fraa. ‡ **9:5** *Kerub* to bo ro mno bo ro Allah yawe, mnan fi *malaikat*. Mam Kejadian 3:24 Allah ybis *kerub* kmot armato ro Eden. Amu wase bo masu mnaif to fyi. **9:5** Keluaran 25:17-22.

fee.

⁶ Raa misoh Sbyah reto, moo bo weto mse mam Sbyah kaket fetu. Tna *imam* ro Yahudi sor ja truk yoyo mam hawar ro tinyi reto sai. Truk tna mno bo wana.

⁷ Menohe *imam* ro yase yesait aran truk mam hawar ro mbau toni reto mato rau. Truk mam hawar ro mbau toni reto to, *tahun* sau truk muhrin sau aran sai. Ati ro ait truk to, truk yatem marak fee. Truk to ybo mees. Ysan bosan reto mkah iro ait yesait yno, tna mkah iro raa ro Yahudi mno ye. Iro wana ro ana mno he ana wase sai ye.

⁸ *Imam* ro yase yno fetu tna Har ro *Tuhan* betoo maja rau k'anu. Mawe mam wore wo Sbyah reto mhau mam tabam refo fares to, raa mam skabuk mam mne sai, menohe bo mno wa ana tibyo ana mam kut-kut msya Allah fefares. Yuk ro Allah yhau to, ana mbau fares.

⁹ Anu bmat bo ro *imamagama* Yahudi weto mno to, bhar bwe mam snok mfo refo, bo ro mno to, matak fee. Soh raa mawe asik mawat k'Allah to, ana msan bo k'Ait. Tna *imam* msan bosan mkah iro wana ro mno ye. Menohe bo ro mno weto to misoh raa mhaf wana fee. Tibyo ana mhar mam mhaf mato mawe ana mkair fares.

¹⁰ Watum ro *agama* Yahudi to □Watum ro Musa,□ aro mkyas boit ro mait, msya aya ro mata, tna iso ro mate aya afo re raa mrok moof. Menohe bo weto beta misoh raa mhaf mato fee. Bo weto misoh raa metsu wana sai. Raa mbo

bo reto to, Watum ro tinyi reto to, matak mammo snok bosu ro tna mama sai.

Kristus yti bosu ro tna

¹¹ Mfo refo *Kristus* yamo *Imam* ranu ro yase. Tna Ait yno bo ro moof miwer. Ait truk mam yuk ro mbau oh. Yuk ro mhau mam sawro ro Allah reto, ro mhau mam tabam refo fee, ro raa mfen fee.

¹² Tiwya *Kristus* truk mam yuk ro mbau toni to, Ait ybo mees ro *kambing* fee. Ybo mees ro *sapi* maku to ye fee. Menohe truk mam yuk ro mbau toni reto to, mkah mees rAit ai. Truk tna ysan bosan reto mun sau aran sai. Yno tibyo bain raa mhai oh. Yno tibyo raa mkai riof mammo snok mam hame wajin.

¹³ Mamyot Watum ro Musa to, □soh awya ro ksoh skabuk Allah, menohe yno bo aro yiwer Watum ro bose reto to, kbe ait yamo skabuk wia fee.□ Yamo yo *k'imam* wia matim. Tna *imam* yoo mees ro *kambing*, soh mfe mees *sapi* ro sme, soh mfe mees *sapi* ro ano to, yko ysan k'Allah. Yko mkak tna yoo boh rau furere abyō mam raa retait. Tibyo Watum ro tinyi reto mawe raa retait yoof u. Raa retait yrok yoof tna kbe skabuk Allah u, ebokfi bo ro *imam* yno reto yyon ait yhaf mato moof fee.

¹⁴ Soh fetu to, fyi mkah mees ro *Kristus* yesait? Mees ro *Kristus* rAit reto matak re misoh anu bhaf mato wanu ye. Har ro *Tuhan* mhau hame wajin. Tna mkah matak rAu to, *Kristus* ysan Ait yesait ai k'Allah. Ait ro yoof toni, ja yhar iro yno to fee. Anu ro bno iro. Ja raa ro mno iro kbe mkai riof fee. Menohe anu bhar mam bhaf mato

bwe anu bkair u fee. Mees rAit matak re mno anu brok boof. Mees ro *Kristus* reto mno anu ksoh bno bo ro Allah yawe. Allah ro yaam oh metait. Bo ro *Kristus* yno reto to, moof miwer bo ro *imam* ja mno.

¹⁵ Anu tiwya biwer Watum ro Musa. *Kristus* yhai afo re yyon iro wanu weto ye. Anu to, Ait bain mhai oh. Au oh meto *Kristus* tait ybo Bosi ro Tna reto. Tibyo yros susai ykyas bo ysyā Allah tna ysyā raa wAit ye. Yno fetō, tibyo awya ro Allah ytu yawe yamo yo k'Ait to, kbe ykai bo ro tiwya Allah ysi reto: Kbe meen ait ykai mafer rau mamō snok mam hame wajin.

¹⁶ Reto mnan si bi yabi sait ro yawe ysan kta rait k'raa anya. Ytom raa yasom yawe meen, ati ro yhai to, kbe raa retait yoo kta rait. Tna ati ro raa mhar mawe bi ait yhai to, raa ro tiwya yawe reto kbe yoo bo ro ait yawe ysan k'ait.

¹⁷ Wore wo bi retait yhau fares to, raa ro ja ait ytom yasom to, ykai kta reto fefares.

¹⁸⁻¹⁹ Reto oh mi tiwya Allah ysi bosī ro tinyi k'Musa to, ati ro ysi to, Musa ktan kak ye: Ktan *sapi* ro tna, msya *domba* ro sme sau, tna yoo mees reto, srioh msya aya tna ysan k'Allah. Ja mees oh mi make bosī to mno matak. Tiwya Musa yros ykyas Watum ro Allah k'raa ro Israel beta. Tna ykyas bo ro Allah ybis beta k'ana. Ykyas mkak tna fo yoo *domba* mawyan ro mkek msya ara '*hisop*' ngkre rau. Ybo bo weto bero mam mees reto tna yitut abyō mam aam ro Watum ro Allah tna yitut abyō mam raa ro mros mari bokyas rait to beta ye.

²⁰ Musa yawe, “Bosi ro Allah ysi k’anu to, mees refo mno bosu reto matak. Allah ysi yawe, ‘Nno bombra beta ro tsi k’anu to, nno kaket!’ ”

²¹ Tna Musa yoo mees reto yitut abyō mam Sbyah reto ye. Tna yitut abyō mam bombra sor ro mhau mam Sbyah reto ye.

²² Raa mkyas Watum ro Musa reto to, ja mawe, “Mam mato reto to, mees to bo ro ati: Watum reto mbis *imam* moo mees mitut abyō mam bombra beta. Mkyas mawe mees reto oh mi mno re bombra mrok moof mnan si, afo re Allah ksoh ymat. Tna mees oh mi mno re Ait yyon iro raa. Iso roto aro fee.”

²³ Tiwya Musa yoo mees, yno Sbyah ro mbau msya bombra ro mhau mam Sbyah reto mrok moof, afo re Allah ksoh ymat. Menohe bombra weto sor to, maja kro bombra ro mhau mam sawro ro Allah sai. Mnany fee. Bombra ro mhau mam sawro weto to bo ro ati. Bombra ro ati weto to, mrok moof mkah bosan ro moof toni. Tna bosan ro *Kristus* ysan reto to moof toni.

²⁴ *Kristus* truk mam sawro ro Allah tna hre ysya Allah. Mfo refo Ait yhou mam sawro tna ja ykyas boyoh ro anu byoh to, yawe k’Allah. Tiwya Ait truk mam Sbyah ro mbau mam tabam refo fee. Sbyah reto to, bo ro raa sgi sai. Sbyah ro ati mhau mam sawro. Ro mhau mam tabam refo to, tii raa sgi kro maja rau ro ati sai meto.

²⁵ Tna *Kristus* truk mam sawro ro Allah tna re ysan bosan mun sau aran sai. Reto mnany. Menohe *imamagama* Yahudi ro yase ja truk mam Sbyah ro mbau reto to, mun aro rau. *Tahun* ti wawa ait ktan kak, tna yoo mees rau, truk. Truk

mam Sbyah reto hawar ro mbau toni tna ysan bosan reto. Ybo mees ro kak sai. Ysan mees ro ait yesait to fee.

²⁶ Mfi bo *Kristus* yamo *imam* yase, ynan *imam* yase ro ja yhau mam tabam refo to, reto moof mnan si fee. Soh feto to, mbam tiwya tinyi Allah yfen tabam refo to, maami Ait ye yama u, tna ye yhai mun aro rau-rau to. Menohe yno feto fee. Ait yama mun sau sai tna raa mame yajat mam ara warok. Yama mam makyon muktis wau wefo to, tna ysan yetsu rAit yesait ai. Yno afo re iro mbo anu u fee. Yno mun sau sai to, mnan. Tna bo ro yno to, mhau matak yum mammo snok mam hame wajin.

²⁷ Anu raa ro bhau mam tabam refo to, ja bhai mun sau aran sai. Bhai tna kbe meen *Tuhan* yoo safo mana ymit k'anu.

²⁸ *Kristus* yhai mun sau aran to ye. Yoo yetsu rAit ysan mnan fi bosan ro ysan k'Allah. Ysan bosan reto mun sau aran sai mkah bo yyon iro raa mawat ro mno. Kbe meen Ait hah yama u. Yama yyon iro raa fee. Reto tii Ait yno oh. Kbe Ait yama yno riof k'raa ro mhau ste Ait.

10

Kristus ysan bosan ro moof toni

¹ Watum ro Musa to, merif bo moof ro meen mama k'anu mam sawro ro Allah. Menohe watum reto merif maja bo ro moof weto to sai. Anu bmat bo moof weto kaket fefares. Bo ro ja raa mno tna mmat mam tabam refo fo, bmat bo ro ati reto fefares. Au oh meto, *imam* sor ja ysan bosan mun aro rau-rau tna *tahun* firwas

tahun. Tna anu bhar bwe bosan ro ana msan reto to, moof mnan si fee. Raa mama skabuk to, ja makah bosan. Mawe msan bosan afo re miranya msya Allah. Menohe bosan weto to matak re mno raa weto mhaf mato mrok moof mnan si to fee.

² Mfi bo bosan weto to, matak re mno raa mhaf mato moof to, kbe raa mammo msan bosan renti u to fee. Mfi bo bosan weto to matak mnan si to, kbe raa msan bosan mun sau aran sai. Feto tna mhar mawe mhaf wana moof mammo snok mam hame wajin. Mhar mawe ana mkair u fee.

³ Menohe mfe: Ana ja msan bosan *tahun* firwas *tahun*. Mno tna me mnaut iro wana ro mno to u ye meto.

⁴ *Sapi* msya *domba* bo to, mees wana matak myon iro raa to fee saut.

⁵ Mees reto matak fee. Feto to *Kristus* yroh yama tabam refo tna yawe k'Allah yawe,

“Jõ thar tawe bosan ja raa msan to mame k'Nyõ nhaf fee. Tna raa msan bosan roto aro mkah iro wana ro mno. Tna bosan weto to mame k'Nyõ nhaf aNyõ fee ye. Menohe Nyõ siwyan Jõ mkah tamo ‘Bosan’ ro mnan si moof kaket.

⁶ Tiwya raa ktan kak, tna mko msan k'Nyõ. Tna msan bosan mkah iro wana ro mno to ye. Menohe bosan wana weto to mame k'Nyõ nhaf to fee.”

⁷ Tna Yesus yawe k'Allah yawe,

“Jõ fi Raa ro tiwya raa mkyas. Mam Bokom aNyõ tiwya raa mkom mawe, ‘Jõ siwyan tna ksoh tno bo ro Nyõ nawe.’ ”

Mazmur 40:7-9

⁸ Mam uu to, tkom bo ro Yesus ykyas trion ewok. Ro tinyi to yawe, “Jō thar tawe bosan msya kak ja raa mko msan to, tna msya bosan ja raa msan mkah iro wana ro mno to, mame k’Nyō nhaf fee.” Fyi re Yesus yawe bo reto? Yawe ebokfi Watum ro Musa mbis mawe anu, raa ro Yahudi mno bo weto.

⁹ Tna fo Yesus yawe k’Allah yawe, “Jō siwyan tna ksoh tno bo ro Nyō nawe.” Anu bmat bokyas trion ewok weto to, tna bhar bwe iso ro tinyi reto Yesus skur beak. Tna re ysair iso ro tna sau.

¹⁰ Yesus yama ysan yetsu rAit oh to, yno bo ro Allah ksoh. Yesus *Kristus* ysan yetsu rAit mun sau aran sai. Tna mkah iso reto to, Ait yoo anu ysan k’Allah re bmo raa wAit.

¹¹ *Imam* ro *agama* Yahudi sor mno bo ro Watum ro Musa mbis: Rabu wawa ana ktan kak tna msan mnan anya bo ro ja soo ana mno wia. Menohe bosan reto matak myon iro raa mno to fee.

¹² Yesus yamo *Imam* ro yase ye. Menohe yno feto fee. Ait ysan yetsu rAit muhrin sau aran sai. Bo ro Ait yno reto matak re kbe yyon iro raa ro mno. Bosan rAit reto ysan mun sau aran tna matak re kbe bain raa mhai oh. Tna yamo hre su ysya Allah mam ati ro yatem ati. Yaut hre mam hroh ro mase reto mamam snok mam hame wajin.

¹³ Tna Yesus hre mam beto ste wea; ste ati ro Allah yno raa ro mamam byoh k’Ait to, mbtek mte. Tna kbe Ait yros yatak abyō ybo ana.

¹⁴ Yesus ysan bosan reto yno raa wAit mrok moof mamam snok mam hame wajin. Bosan reto to, ysan mun sau aran sai tna reto mnan si. Yesus

yisoh raa wAit kri-kri fares ye.

¹⁵ Mam bokom ro *nabi* Yeremia, Har ro *Tuhan* mkyas bo reto k'anuu ye. Mawe,

¹⁶ "Kbe meen Jō tkyas bosu ro tna k'raa ro Yahudi. Meen tno re watum aJō mhau k'ana makit msya mhaf wana ye."

¹⁷ Tna mawe,

"Iro msya safo ro ana mno to, kbe Jō tyon mkak; mnan fi kbe Jō sorni makus."

Yeremia 31:33-34

¹⁸ Yesus yatak yyon iro msya safo ro raa mno. Feto to raa ktan kak msan fares to, mkah bawya? Ne nno bo weto u ma.

Beroh smot Yesus matak

¹⁹ Taja, tme, tao, tano na; mees ro Yesus rAit reto myon iro wanu oh, mno anu boof. Feto nma, anu bmo bo k'Allah mam yuk rAit ro mbau toni reto. Waa ma.

²⁰ Yesus sair iso ro tna refo. Ait yhai to, tna yetsu rAit mfi *horden* ro burut wa hawar ro mbau reto to, yno mrok ntwat tna mato maah. Tna mfo refo Ait yhau tna ytar anu truk bmo bo k'Allah.

²¹ Yesus yamo *Imam* ro yase ranu. Ait tait yerif iso re kbe anu bmo bo k'Allah. Anu fo raa ro Allah wAit.

²² Feto to, nma, anu bmo biranya bsya Allah. □Anu bashana oh.□ Tibyo raa *baptis* anu mkah aya oh. Feto tna anu bhar bwe bhaf wanu mrok moof. Anu bhaf wanu mrok moof oh, mnan fi raa ro mate aya ro moof oh, tibyo metsu moof. Anu bhar bwe anu smot Ait kaket. Anu fo srau ewok fee.

²³ Anu bhau bkyas riof ro meen mama k'anu. Bnaut bwe Yesus ro tiwya ykyas riof reto. Tna bo ro yawe yno to, kbe ybo yno tu oh. Feto to, nma, anu bhau bhaf binaut riof reto yoyo.

²⁴ Nma, anu sobu anya nwe batmof anya tna bno bo moof k'anya ye.

²⁵ Nma, kbe anu hre su tna skabuk su ye. Raa taro ja haweboh bo skabuk. Anu bhar bwe ayō ro *Kristus* hah yama u to, kene oh. Feto to nma, anu bros tis anya, tna bkyas bo moof k'anya afo re anu smot *Tuhan* matak.

²⁶ Soh anu bhar iso ro ati oh, menohe ja bno iro fares to, anu biwana *Kristus*, ro ysan yetsu rAit. Ysan mkah bo yyon iro wanu ro bno. Raa ro beroh mno iro fares to, ana mikyak bo ro Ait yno oh meto. Tna bosan roto aro ro kbe myon iro wana to, aro u fee.

²⁷ Ana weto kbe waa fea! Ana mhar mawe meen *Tuhan* yoo safo mana ymit k'raa ro mamobyoh k'Ait. Tna mhar mawe tafoh ro mase meen mait ana weto ye.

²⁸ Tiwya bo mafa ranu, raa ro Yahudi to, anu bkyas bwe, "Awya sai ro yiwer Watum ro Musa to, raa mai ait yajat. Soh raa mabo ewok, soh mfe mabo tuuf maun ait to, kbe raa matmof ait fee, raa mai ait yajat yum."

²⁹ Soh raa yiwer Watum ro Musa to, yno bo ro mkair. Kbe raa moo safo mee mai tu oh. Soh fetoto, kbe fyi soh raa yikyak Ku ro Allah yare? Bo reto bo ro mkair toni! Ro yno fetoymat mees rAit yawe mkair. Yesus mees rAit mno bosiro tna reto matak. Tiwya mees ro Yesus misoh ait re yamo raa ro Allah rAit. Tna mfo refo raa retait

yawe mees reto mkair. Ait retait yamus Har ro *Tuhan* oh meto. Yamus Har ro tiwya matmof ait. Tibyo kbe meen bo samyoh ro msai toni kbe btek mai k'ait.

³⁰ Anu bhar Allah yhaf msya srau rAit. Bhar bwe Ait yawe,

“Jō oh mi ska bo tna tno bo ro samyoh mai to.
Bo woJō weto kbe tno tu oh!”

Ulangan 32:35-36

Tna yawe,

“Kbe *Tuhan* yoo safo mana ymit k'raa wAit.”

Mazmur 135:14

³¹ Allah tait Allah ro yaam. Meen Ait yoo safo mana ymit to, bo ro msai toni reto.

³² Nnaut mam wore tinyi anu nmo no k'Yesus, tibyo nhau mam kek rAit. Ati reto to, bo ro samyoh mama mai k'anu. Menohe anu nros ntak.

³³ Ti aro rau raa masah anu. Tna raa mai anu. Tna ti aro rau bo ro samyoh feto mai nfoh na wanu ye. Menohe wore weto anu nros su nsya ana ye.

³⁴ Nfoh na wanu taro to, raa mfot mbu mam *bui* mato. Menohe tiwya anu nmo nmat ana, nkyas bo ro moof k'ana. Anu smot Yesus tibyo ti aro to, raa mama mtak bo wanu ye. Menohe anu ja kmo fee. Anu nhar nwe mam mato ro bosmot ranu to, anu nhaf nse bo ro moof miwer bo ro anu bhaf bse mam tabam refo. Anu nhar nwe anu nbo bo ro meen mhau hame wajin. Feto to anu simaut mase.

³⁵ Bo ro anu smot tna nhar weto to, nbo kaket matak oh! Anu smot Allah kaket tibyo Ait siwyan bo ro moof toni tna kbe yaren anu.

³⁶ Beroh nno bo ro Allah yawe to, nno renti. Nno mkak, tna bo ro ysi k'anu to, kbe yoo yee k'anu.

³⁷ Bokom ro Allah mawe:

"Tuhan tait kene wore yama oh meto. Kbe nyum ti aro u fee.

³⁸ Raa ro ja beroh smot Jō to, tawe ana weto oh mi mfi raa ro mhaf moof ati to. Menohe soh ana haberek kbor tna mawe me smot Jō u fee, ana weto mame k'Jō thaf fee."

Habakuk 2:3-4

³⁹ Menohe anu fo kbe haberek kbor fee. Anu fo kbe Allah yno safe mkak fee. Anu smot Ait tibyo yno riof k'anu.

11

Raa ro tiwya smot Allah

¹ Bosmot ro matak to bawya? Awya ro smot *Tuhan* matak yhar yawe bo ro yhaf yinaut to, kbe mabo tu oh. Bosmot rait reto to matak. Awya ste bo ro ait yasu ymat fefares to, tna yhar yawe bo reto meen mabo to, bosmot rait reto to matak.

² Tiwya tinyi hohos wanu taro smot Allah matak feto. Reto oh mi Allah yawe ana mno bo moof.

³ Anu smot Allah matak tibyo anu bhar bwe Allah yfen tabam refo msya ayoh skes bo beta. Bo ro anu bmat mfo refo to, Ait yno re snok mbam bo ro marak fares sai. Yawe sai mkah yasoh tna yno bombra beta mabo oh meto.

⁴ Tiwya Habel smot Allah matak. Ait yoo bo ro moof ysan k'Allah. Menohe yao Kain yari bo ro Allah yawe fee. Tibyo yoo bo ro mkair tna ysan k'Allah. Habel smot bo ro Allah yawe to

kaket. Tibyo Allah yawe bosan ro ait ysan to, bo moof. Tna Allah yawe ait raa ro yhaf moof ye. Tiwya ooh-oh Habel yhai oh. Menohe mfo refo anu bmat tna bkyas bosmot rait fares.

⁵ Tiwya Henokh smot Allah matak, tibyo yhai fee. Allah tubat ait mkah yaam yaut yamo't sawro rAit. Tibyo raa saso Henokh, menohe mkai fee. Bokom ro Allah mawe wore Henokh yhau fares to, Allah yhaf mnan ait. Yno feto tibyo Allah tubat ait mkah yaam, yaut yamo sai.

⁶ Awya ro yamo yo k'Allah to, tinyi rau to ait yhar yawe Allah yabo tu oh. Tna yhar yawe ja Allah yno bo ro moof k'raa ro saso Ait kaket. Raa ro smot Allah matak fee, mno Allah yhaf mnan fee saut.

⁷ Tiwya Nuh smot Allah matak, tibyo yfen aken sau. Allah ykyas k'Nuh matim wia, yawe kbe yoo safo mana ymit k'raa. Yawe kbe yno bo ro mkair mai k'raa ro tabam refo. Bo ro Allah yawe kbe yno mai k'raa to, yno fefares, Nuh yasu ymat fefares. Menohe yhar yawe Allah yesait aran yase. Tna re yari bo ro Ait yawe tna waa. Tibyo yfen aken reto mkah yasyõ fnya msya kukek wait ro sme, tna msya fnya wana bo re mkai riof. Bosmot ro Nuh matak. Tibyo ait yari bo ro Allah yawe, ybo yno. Tna Allah yawe ait raa ro yhaf moof. Bosmot rait reto mno riof k'ait ysya fnya, kukek wait weto. Menohe Allah ymat yawe raa taro smot Ait mfi Nuh fee. Tibyo ana weto safe mkak.

⁸ Tiwya Abraham smot Allah matak, tibyo yari bo ro Allah yawe, tna ybo yno ye. Allah ytu ait ybis yawe yasen sikba rabin rait tna yamo't rabin roto; ro ait wase fares. Tibyo Abraham yasen, satoh bo wait, tna yamo't rabin raa. Allah ysi bo k'ait yawe meen ysan rabin reto k'ait.

⁹ Abraham smot Allah, tibyo yamo yhau mam rabin raa reto, yfi raa srim. Yhau mam rabin ro Allah ysi yawe ysan k'ait to, yhau mam sbyah sai. □Yhar yawe yhau mam tabam reto kait fee.□ *Tahun* firwas *tahun* tna ku rait Ishak ysyat yatat Yakub ja mhau mam sbyah sai ye. Ana mbewok mnaut bosu ro tiwya Allah ysi k'ana maja rana ye.

¹⁰ Abraham yhau mam sbyah sai tna yhaf yinaut yawe meen ait yamo yhau mam remo ro Allah rait. Yhau mam remo ro matak tna mhau yum reto, remo ro Allah sgi tna siwyan k'ait yhau tibyo.

¹¹ Abraham smot Allah matak. Tna ait yhar yawe bo ro Allah yawe yno to, kbe ybo yno tu oh. Tibyo Abraham ysyat Sara* mabe ku sait. Abraham ysyat yfain fai Sara to, mabi toni oh.

¹² Yabi oh, tibyo yetsu ssafo yabe ku u fee. Menohe yabe ku. Tna ku retait yabe ku renti mawat. Abraham tait raa sait aran sai, tna yabe ku renti wait mawat; mnau sken ro ja mhau mam ayoh skes. Tna kbe raa aro mros ntuu ku renti wait fee. Ana msis mnau fi snyik ro mftau mboh mam aya sawan maam.

11:8 Kejadian 12:1-5. **11:9** Kejadian 35:27. * **11:11** Sara to fnya ro sibau. **11:11** Kejadian 18:11-14. **11:12** Kejadian 21:2. **11:12** Kejadian 15:5.

¹³ Raa wore wo tkyas mam uu to, ana mkai bombra ro Allah ysi weto fefares. Menohe bosmot wana matak fares; ana mhau to, mhaf minaut tna ste bombra weto ro meen mama. Ana ksoh bo weto tibyo simaut. Tii ana beta mhai to, mhaf mse bombra weto fefares. Ana mawe ana mhau mam tabam refo mnan fi raa srim sai.

¹⁴ Soh raa mkyas fetu to, anu bhar bwe ja ana ste rabin roto taro, rabin rana mesait.

¹⁵ Ana mawe ana mnan fi raa ro srim. Mfi bo ana mnaut rabin wore wo tiwya ana mhau to fares, maami ana mhah me mamot rabin reto.

¹⁶ Menohe ana mhaf minaut rabin taro ro mhau mam tabam refo fee. Ana minaut rabin sau ro moof miwer; ro mhau mam sawro ro Allah rAit. Allah siwyan remo sau k'ana mkah bo meen mhau oh. Tna raa weto minaut remo reto. Fetu to raa mkyas Allah to mawe, "Ait fi Allah ro ana weto smot." Ana mawe fetu tna Ait ksoh; Ait saban fee.

¹⁷ Tiwya Abraham smot Allah matak, tibyo yari bo ro Allah yawe, tna ybo yno ye. Allah sanet ait ybis yawe yoo ku rait Ishak ktan. Tna Abraham yawe, "Ae, kbe tno oh." Ti reto to, Allah ysi bo k'ait oh tna ykyas ku renti wait oh. Tna Ishak tait ku ro Abraham yabe sait aran. Menohe Abraham siwyan yawe ysan ku retait k'Allah.

¹⁸ Ebokmi ait ynaut yawe tiwya Allah yawe ku rait Ishak oh mi meen yabe ku renti msis-sas.

¹⁹ Abraham ynaut yawe Allah yatak yno Ishak yrok yasen. Tibyo Abraham siwyan ktan Ishak. Tna kene wo mabo oh. Kene mo sbok. Menohe Allah yno wa. Fetu to Abraham ynaut yawe

mnan fi mabo. Tna yawe Allah yno ku rait Ishak yrok yasen.

²⁰ Tiwya Ishak smot Allah matak, tibyo skabuk yayoh Allah yawe yno bo ro moof ku wait mabo ewok. Yayoh Allah re meen yno bo ro moof k'Yakub ysya Esau.

²¹ Tna Yakub smot Allah matak. Ati ro ait yabi oh, kene wo yhai to, ait skabuk yayoh Allah yawe yno bo ro moof ku ro Yusuf wait mabo ewok. Tna tmi yana mam armuk rait tna ybaut Allah.

²² Tiwya, mam tabam ro Mesir to, Yusuf kene wo yhai. Ait smot Allah matak. Tibyo ybo bo ro Ait yawe matak ye. Yhar yawe meen Allah yakah raa mana ro Israel snok mbam tabam reto. Tna Yusuf ysi bo k'raa wait yawe ati ro ana snok mammo to, ana moo ait ytai rait to, makah mammo ye. Yawe ait ytai mhau akus fee.

²³ Tiwya Musa yme mabe ait. Tna *raja* Mesir ybis yawe raa behoh ku sme beta majat. Menohe raa mabi wait mmat mawe ku retait yoof toni. Tna ana waa *raja* retait fee. Ana smot Allah matak, tibyo ana moo Musa mimyõt wai snyi trion tuuf.

²⁴ *Raja* retait, ku ro ano rait, mayõ Musa, mtos. Tibyo Musa yhau mam amah rau tna yabi. Menohe ait smot Allah matak. Tibyo yawe k'raa yawe ait ku ro au mabe metait to fee.

²⁵ Ait hawe bo yhaf yse bo moof ro Mesir. Ait hawe bo yno iro. Tna yhar yawe bo moof mam tabam refo to, mhau waor sai. Feto to yasen

yamo yhau ysyaa raa mana ro Allah rAit. Yhau ysyaa ana weto to, bo samyoh mai k'ait.

²⁶ Yhar yawe Allah ysok raa mana rait ro Yahudi reto yawe ku renti wana weto oh mi meen mabe *Kristus*.† Musa yhau ymat bo ro meen mama reto to, yawe mafer moof k'ait. Yawe mafer moof toni miwer kta ro Mesir beta. Feto tibyo Musa yawe yhau ysyaa raa mana ro Israel. Yawe kbe bo samyoh mai k'ait rof.

²⁷ Ait smot Allah matak. Tibyo yasen frok ybam Mesir. Ait yhar yawe kbe *raja* kmo ait. Menohe ait waa fee. Ait smot Allah, ro ja raa mahni. Menohe Allah yerif Ait k'Musa.‡ Feto to ait yawe beroh sikba Mesir.

²⁸ Musa smot Allah matak. Tibyo yari ybo bo ro Allah yawe. Tna yakyō korat ro *Paskah*. Yno si to, yoo mees karu mam amah sor raa ro Israel wana ja mhau. *Malaikat* sau mama mame kubum raa ro Mesir beta. Menohe Musa yoo fito reto yai wa feto. Tibyo *malaikat* reto mama mame kubum raa mana ro Israel weto to fee.

²⁹ Raa ro Israel smot Allah matak. Tibyo ana mroh mamō frit sawan ro '*Laut Merah*' mnan fi ana mamō mam tabam ro ngkaat sai. Tna raa ro Mesir mawe ana mno feto ye. Menohe mfe; Allah yno raa ro Mesir to beta msu mkak saut.§

³⁰ Raa ro Israel mamō mur mam remo ro mabi sau, masom Yerikho. Mamō mur ti trion krema.

† **11:26** Som reto to, "Ait ro Allah ysok tna yawe yamo *Raja*. Mai ro Ibrani raa mawe *Mesias*, tna mai ro Yunani raa mawe *Kristus*.

‡ **11:27** Keluaran 3 mkyas tii wore wo Allah ykyas bo k'Musa.

§ **11:29** Keluaran *pasal 1-14*

Ana smot Allah matak. Tibyo yno fraa ro raa mafir mur mam remo reto to, mrok nraref.

³¹ Tiwya raa ro Israel baro mama mmamat tan remo ro Yerikho to. Mamo mmamat tan, tna Rahab moo raa weto mimyōt wai mam amah rau. Tna re ana mkai riof. (Rahab to fnya ro Yerikho. Au to fnya ro ja mwyah.) Menohe raa roto ro mhau mam Yerikho ja mari bo ro Allah yawe fee. Tna raa sbe ro Israel mama mame raa ro Yerikho weto. Mama mame ana majat. Menohe Rahab smot Allah matak. Tibyo raa mame au majat fee.

³² Kbe jō tawe bo bawya naut u? Ayō mnan fee. Feto to tkyas Gideon, Barak, Simson, Yefta, Daud, Samuel msya *nabi* makin sor taro fee.

³³ Ana weto beta smot Allah matak. Feto to, ana taro mafa rabin roto taro tna ana mros matak. Tna raa ro mammo byoh k'ana to, mbtek mte. Ana roto taro mammo raa ro mase tna mbo raa wana kakat moof. Taro to fri *singa* ro nsafō, menohe *singa* weto mafit ana mabo fee.

³⁴ Ana ro smot Allah weto to, taro truk mam tafōh ro mait. Menohe tafōh reto mait ana sohabyoh fee. Raa wanu taro to, byoh saka ana, mawe mame ana majat, menohe ana mkai riof. Taro to raa ro maka sne, ssafo fee, menohe mrok matak. Tna taro matak re mafa msya raa mana roto taro kakat. Tibyo raa ro mammo byoh k'ana weto msam mammo.

³⁵ Fnya baro ro smot Allah kakat to, raa wana ro mhai oh to, mrok masen. Menohe raa roto taro smot Allah kakat, tibyo raa mfot ana mai. Raa sikowah ana. Menohe mawe raa mai ana majat rof, bitsre ana mammo fee. Mawe fetō afo re

meen Allah yno ana mrok masen. Mrok masen tna kbe yno bo moof k'ana miwer yno k'raa roto taro.

³⁶ Raa taro smot Allah kaket, tibyo raa sret ana masah. Tna moo too mok-mak ana. Taro to raa moo *rantai* make, tna mbu ana mam *bui* mato.

³⁷ Taro to raa moo fraa mai majat. Tna taro to raa ktan mabuf ewok. Tna taro to raa moo tfo ro miyō, takoh ana tna majat. Taro mse ratan aro fee, tibyo ana moo *domba* marak soh mfe *kambing* marak sai myum. Ana to, boit msya bo ro ana mse to, mabut. Raa mno bo ro samyoh mai k'ana. Raa mno bo mkair k'ana ye.

³⁸ Amah ro ana weto mhau to aro fee. Tibyo ana mam ninya mhau mam yuk ro riamo; mam atu, tna mam isra msya ako mato ye. Raa ro tabam refo hawe ana, mnaut mawe ana raa ro mkair. Menohe raa ro tabam refo to, Allah ynit msya ana weto yawe mnan anya fee. Anu bhar bwe raa ro smot Allah matak weto to, raa ro moof miwer.

³⁹ Raa weto beta tiwya smot Allah matak. Reto oh mi ana mno Ait yhaf mnan. Menohe ana beta mhai. Mhai wia tna bombra ro moof Allah ysi k'ana to, sait ykai fefares.

⁴⁰ Allah ynaut yawe soh ana mesait aran mkai bombra ro tiwya ysi to, moof fee. Yawe soh anu ro smot Ait mfo refo to, nsya ana ro tiwya tinyi smot Ait weto, kbe nkai bombra ro tiwya ysi weto su to, moof miwer. Allah ksoh yawe anu raa mkbair ewok weto, beta mam raa ro mhaf moof mnan si, aro mabut fee.

12

Beroh smot Tuhan matak

¹ Raa ro tiwya smot *Tuhan* to msis oh. Tna ana mhau mmat rof anu. Feto to nma, anu beroh smot Ait matak ye. Bo bawya ro mno wa bosmot ranu to, noo beak makus. Iro msya bo mkair ro anu bno to, kbe mno anu btek bwe. Feto to nno u ma. Nma, anu brob btak smot *Tuhan* matak mam mam smok sbok rau. Nma, anu bhoh wai k'Ait mam iso ro moof. Ait yerif iso reto k'anu oh. Mfi bo raa baro santri anya mhoh to, ana mhoh mamom't makit rau to, tna kbe moo bouum ro raa siwyan muumto mee k'ana.

² Nma, anu bsu bfi fon to, bmat Yesus aran. Ait oh mi raa ro sair iso re kbe anu smot Ait tna bmo bo k'Allah oh meto. Tna Ait oh mi kro iso ro bosmot reto kakat mnan si mam smok mam tis rau to ye. Tiwya yhau mam tabam refo to, Ait yhar yawe kbe meen Allah yoo simaut ro mase yee k'Ait riryon shauk bo samyoh ro Ait yasom. Tibyo Ait yajat mam ara warok, menohe Ait hrenaut fee.* Yawe kbe yasom bo mkair reto sai rof. Yajat tna fo yaut yamo yo k'Allah. Allah hre mam ambar-tahta rAit. Tna Yesus hre su ysya Allah mam ati ro yatem ati.

³ Kbe ati ro raa mno bo ro mkair mai k'anu fo, nnaut Yesus. Tii raa ro ja mno iro to, ana mno bo mkair mai k'Ait ye. Yesus beroh tna yasom bo weto ro mai k'Ait. Ja anu bsom bo ro samyoh weto fee, bsom bo ro mnan-nan sai. Nnaut bo

* **12:2** Mam wore wo Yesus yhau to, raa ro mkair toni sai aran raa mame majat mam ara warok. Raa majat mfi feto to mti saban toni.

reto re kbe soh anu hrowyõ to, kbe anu bitsre bosmot wanu to ma.

⁴ Ja anu beswan iro to. Menohe anu aro nno mamu snok nkai yaaf o nhai bo fefares.

⁵ Nsorni ma watum ro Allah: Mam bokom sau raa sait ykyas bo ku sme rait. Bokom far-far wefo mkyas bo k'anu, ku wAit ye, mawe:

“Ku ajõ: Ti aro *Tuhan* yno bo ro samyoh mai k'anu afo re anu brok bhar bo. Soh Ait bhah anu to, niwana ma! Kmo ma! Tna ati ro anu nno bo ro mkair, tibyo Ait yastako anu to, hrowyõ ma.”

Ayub 5:17

⁶ “Nnaut nwe *Tuhan* yno bo reto k'raa ro Ait ksoh. Awya ro Ait ytu yawe yamo ku rAit to, soh ait retait yno bo ro mkair aro to, kbe yno bo mai k'ait riryõn afo re ait yhar yawe ye yno bo reto u ma.”

Amsal 3:11-12

⁷ Bo ro Allah yno mai k'anu to, mfi bo raa mabi ja mno kukek wana. Feto to beroh kanyin sai. Soh ku wana mno bo ro mkair to, raa mabi mastako tna mai ana fea!

⁸ Ja raa mabi mastako kukek wana. Tna misoh ku wana, afo re ana mashana tna mari bo ro raa mabi mawe kakat. Tna anu fo ku ro Allah wAit. Feto oh mi Ait yastako anu tna yno bo mai k'anu, afo re anu nashana ye. Soh yno feto fee, anu to ku wAit fee, menohe nfi ku ro ja fnya mabe-aba sai.

⁹ Soh anu bno bo mkair to, kbe bja wanu ro tabam refo mai anu fea! Tna anu heyut bmat ana. Anu bri bo ro ana mawe. Feto kbe anu bsom bo ro Allah yno mai k'anu feto ye. Ait tait

anu Bja ro yhau mam sawro rAit. Kbe anu heyut bmat Ait tna bri bo ro yawe. Bhar bwe yno feto afo re riof k'anu.

¹⁰ Tiwya anu bja wanu mno bo mai k'anu, tna mitsre bo ro samyoh mai k'anu *tahun* baro sai, mam wore wo anu bkek fares sai. Mno bo ro ana mnaut mawe misoh anu boof. Tna anu bhau mam tabam refo fares to, Allah yitsre bo ro samyoh mai k'anu afo re yisoh anu boof. Re kbe meen anu brok boof mnan Ait ye.

¹¹ Bo samyoh ro Allah yitsre mai k'anu to, ati ro anu bkai to, anu bnaut bwe bo mkair. Mno anu sraujin. Menohe raa taro bito masom bo weto mamno snok mam sboh rau. Tibyo bo samyoh reto misoh raa weto mhaf wana: Mno ana mhaf tnok tna mno re ana ksoh mno bo ro Allah ksoh ye.

¹² Anu ro naa sne to; nsen nsit nros.†

¹³ Anu bmo mam iso ro bosmot. Nisoh betrot iso reto, afo re anu smot Allah matak. Raa baro to, bosmot wana matak fee. Nno bo ro misoh bosmot wana mamno matak. Nisoh iso re kbe anu aro btek nwe fee. Feto re nros ntak.

¹⁴ Tomer re kbe nhau niranya nsya raa beta. Tna tomer nhau nno bo ro Allah wAit sai. Raa ro mhau mno bo ro Allah wAit sai to, mesait sai aran kbe meen mmat Allah mam rabin rAit.

¹⁵ Nhau to, kmot anya kakat. Afo re anu beta nmo mam iso ro Yesus sair tna yatmof anu reto. Nno be anu aro sikba iso reto tibyo nkai boatmof ro Allah fee. Raa ro mweh iso reto to, ana miwro raa mawat. Ana mno iro. Tibyo raa mawat kbe

† **12:12** Far-far refo mkyas Yesaya 35:3, tna fret bo mawe, "Nisoh nhaf wanu. Nisoh bosmot wanu ro matak fefares. Nisoh kakat re matak."

mkai riof fee. Ana weto mnan fi raa ro mji foo, tibyo syoh mawat mhai.

¹⁶ Nhau to kmot anya. Afo re anu aro nwyah, nus-as bo to ma. Afo re anu aro wase Allah ma. Nno be anu nnan fi Esau, ro tiwya wase Allah. Ait wase Allah tibyo yiwana bo moof ro yaja yawe ysan k'ait. Yiwana kta ro yaja yse mkah ku bum rait reto tna ynaut boit ro ifo yait sai. Yno fetu yasim kta reto.

¹⁷ Esau yno bo reto. Tna fo hre ye ynaut bo ro yno. Tna yayoh yawe yaja yno bo ro moof reto k'ait. Menohe ait aro ye fri bo weto fee. Tibyo ait sraujin tna yawia. Yawia menohe aya mhau mam srau oh. Yaja yno bo moof reto k'ait fee.

Atu ro Sinai hayah tna faut ro Sion to hayah ye.

¹⁸⁻²¹ Tiwya Allah yoo watum rAit yee k'Musa mam atu ro Sinai. Mam wore weto to, Allah yawe wa yawe raa aro mamu kene kait mam atu reto to ma. Allah yno tafoh mait mam atu reto, tna yno mamur hto msya foos ro msai bo mfi ye. Yno raa mari bo sau mawia fari mnan fi raa mfi saa bo fetu. Tna ana mari mai ro mno ana waa toni. Mai reto mbis mawe,

“Raa msya kak bo to, aro mamu kene kait mam atu reto to ma. Soh bo aro mamu miir atu reto mair to, nme bo reto majat: Noo fraa nii kak reto majat.”

Keluaran 19:12-13

Ana mari mai reto tna mrok waa. Tibyo ana soh-soh Allah mawe ykyas bo k'ana u ma. Tiwya Allah yoo watum rAit k'raa ro Israel to, yno bo

ro msai toni weto. Musa ymat bo weto tna yhaf aya yawe,

“Jõ waa tetet thai!”

Ulangan 9:19

Menohe iso ro anu nmo no k’Allah to, iso ro hayah.

²² Ja anu nmo no k’Allah mam iso ro maut faut ro Sion.‡ Sion to mnan fi Yerusalem ro mhau mam Sawro ro Allah. Tna anu nmo kait no k’Allah ro yaam to, ro yhau mam sawro rAit. Anu nmo mam iso reto oh. Anu nmo no *k’ malaikat* msisas. *Malaikat* weto hre su tna simaut mase.

²³ Anu nmo mam iso reto tibyo anu nmo raa mkbair ro Allah wAit to. Anu fo ku wAit ro masom. Anu nsom wanu to, Allah ykom mam sawro rAit oh. Kbe meen anu nhau nsya Ait su mam sawro rAit. Anu nmo no k’Allah oh. Ait oh mi meen yoo safo mana ymit k’raa beta. Anu nmo raa mkbair sau su nsya raa wAit ro mhai wia matim; raa ro Ait yisoh mhaf wana moof mnan si, aro mabut fee.

²⁴ Anu nmo no k’Yesus oh. Ait ybo Bosi ro Tna reto matak mkah mees rAit. Tibyo yros susai ykyas bo ysya Allah tna ysya raa wAit ye. Tiwya Habel raa mame yajat ye. Tna mees rait frok ye. Menohe mees ro Yesus ysan to, mafer moof miwer: Yesus yhai afo re Allah yyon iro wanu.

²⁵ Nri bo ro Allah yawe k’anu. Niwana ma! Musa tait raa ro tiwya yhau mam tabam refo sai. Tii ait ykyas bo ro mbam Allah k’raa. Menohe raa miwana bokyas ro Allah reto. Tibyo bo ro

‡ **12:22** Faut ro Sion fret bo mawe iso ro tna. Yesus ysair iso ro tna mkah bo anu bmo bo k’Allah. **12:24** Kejadian 4:10.

mkair mama mai k'raa weto. Mfo refo *Kristus* oh mi Raa ro ykyas bo ro mbam Allah k'anu. Ait ybam sawro ro Allah yroh yama. Feto kbe nri bo ro Ait yawe. Haberek kbor k'Ait ma, be kbe bo ro mkair toni mama mai k'anu.

²⁶ Tiwya Allah ykyas bo mam atu ro Sinai tna tabam mrok mnah. Tna mfo refo Ait ysi yawe, "Meen Jō tno tabam refo mnah u ye, tna msya ayoh skes mnah ye!"

Hagai 2:7

²⁷ Yawe yno tabam refo mnah u. Yawe kbe meen yno mnah toni tibyo bombra ro yfen mam tabam refo beta marak. Tna bo ro meen mhau mawyōs aran kbe mhau. □Reto bo ro tii ysi k'anu, raa wAit ye.□

²⁸ Meen anu bmo bhau mam sawro ro Allah yamo *Raja* ybo to. Tna sawro ro anu bhau reto to, mhau matak hame wajin. Feto to nma oh, anu byoh asik mase k'Ait tna heyut bmat Ait, tna waa Ait ye. Soh anu bbaut Ait kaket oh meto, kbe Ait yhaf mnah.

²⁹ □Tiwya tinyi Musa yawe,□ "Allah tait yatak toni ynan fi tafoh ro mait bo mkak."

13

¹ Nhau nsya anya to, niranya moof.

² Raa ro srim to, msya raa ro anu wase to, nmen ana nmo nse mam samu wanu. Tna nsorni ma, noo boit nee k'ana mait ye. Raa ro mno feto to, baro moo boit mee *k'malaikat* oh meto. Menohe ana wase.

³ Raa ro raa mbu mam *bui* mato to, nmo nmat ana ye. Nros tis nban ana. Nnaut nwe ana mnah

anya mfi bo anu ai, oh mi raa mbu mam *bui* mato meto. Nros tis nfoh wanu, mam wore wo raa mno bo ro samyoh mai k'ana ye. Nnaut nwe nnan anya mfi bo weto mai k'anu ai.

⁴ Soh raa moo fnya tna fai reto mam msya ait to, tawe raa beta kbe mros tis k'ana mbewok re miranya matak. Allah yawe wa yawe raa bitsre anya ma, tna mam mwyah bo to ma. Kbe Allah yoo safo mana ymit k'raa ro mwyah weto.

⁵ Allah ykyas mam bokom rAit yawe,
 "Jō sikba anu fee saut. Jō thau su tsya anu yum."
 Ulangan 31:6,8

Feto to, nsu mase mkah pitis to ma. Nhau to, nnaut nwe bo bawya ro anu nse oh to, nnan.

⁶ □Riwai Bokom ro Allah mawe kbe Ait sikba anu fee. □Tibyō anu bhar bwe, *Tuhan* ja yban tis anu. Tibyō anu waa bo ro kbe raa mno mai k'anu to fee.

⁷ Nnaut raa ro tiwya mkyas watum ro *Tuhan* k'anu. Nnaut bo ro moof ja ana mno msya mafer rau. Tna smot *Tuhan* kaket nnan fi ana ja smot ye.

⁸ Yesus *Kristus* ja yhau ynan anya sai, ja haberek fee. Iis, riwai, tna mfo refo ye, tna mamo snok mam meen hame wajin to nnan anya sai. Ait yhau fetō yum.

⁹ Mfo refo raa baro mkyas watum roto taro sor. Ana mawe wa raa mawe mabo fane bo to ma. Mawe mbau. Kro watum rana reto to ma. Ana ro mno fetō mkai mafer aro fee. Nnaut nwe bo mafa ro *agama* ja ana mno soo oh to, mno bosmot rana to, mo matak fee. Nri ana ma. Nri *Tuhan* ro yatmof anu. Ait oh mi ro ysan boatmof

rAit u k'anu. Nnaut nwe boatmof rAit oh mi kbe mno bosmot ranu mo matak renti.

¹⁰ Soh *imam* ro Yahudi ksoh yawe Allah yyon iro raa wana to, ana truk mam Sbyah ro Allah. Tna msan *sapi* msya *domba* bo to, mam wohat ro mbau. Mbau menohé watum rana mbis mawe ana mesait moo baro mabo ye. Anu smot Yesus, tna bhar bwe bo ro Ait yno oh mi 'bosan' ro matak mkah bo myon iro wanu. *Imam* wetó smot Yesus fee. Tibyo ana fri mafer ro moof reto to fee ye.

¹¹ Mam korat ro masom *Pendamaian* to, raa msan bo to, mno fetó fee: Ja *imam* ro yase ktan *sapi* msya *kambing*. Tna yakah mees reto, ntruk mam yuk ro mbau toni. Mees reto ait ysan afo re Allah yyon iro ro raa mno. Menohé *sapi* msya *kambing* mabuf wetó raa moo makah frok mbam Sbyah reto. Raa moo tafoh mamó mkah mam mne.

¹² Tiwya raa makah *sapi* msya *kambing* mabuf wetó mamó frok mbam remo. Tna Yesus ye. Raa makah Ait mamó frok mbam remo mamó mame mam mne ye. Yitsre raa mame Ait afo re mees rAit reto myon iro ro anu bno. Au oh mi Ait yoo anu ysan k'Allah re anu bno bo wAit sai.

¹³ Ait raa mame mam remo mne rau. Tibyo raa makin miwana Ait, sret Ait masah. Nma, anu kro Ait bmo't remo mne ye. Bitsre raa miwana anu, sret anu masah fetó ye.*

¹⁴ Nnaut nwe mam tabam refo fo, yuk ro anu bhau tibyo fee. Anu bhaf binaut bwe ste remo ro anu meen bhau mamó snok mam hame wajin.

¹⁵ Yesus yamo *imam* ranu ro yase. Bo ro anu bsan

* **13:13** Nmat Ibrani 12:2msya *catatan kaki rau*.

k'Allah to, au oh mi anu bibi Allah yasom rAit tna bwe asik mase k'Ait yoyo.

¹⁶ Nsorni ma nno bo moof k'raa. Noo bo nee k'raa. Bno fetoto, Allah yawe mnan fi anu bsan bo k'Ait, tna bno yhaf mnan oh meto.

¹⁷ Nri bo raa wanu ro mase mawe to. Nbo nno. Ana oh mi raa ro mbo anu tna kmot anu. Kbe meen Allah ytu bo k'ana tna ana mkyas bo bawya ro ana mno. Soh anu nri ana tna nno bo moof, kbe ana ksoh. Tna soh anu nno bo ro mkair, kbe ana sraujin, tna mafer marak k'anun esait ye.

¹⁸ Skabuk amu ro nkom aam refo ye. Amu nnaut nwe ja amu nhau nhaf moof. Tna amu nhau to, ja nwe nno bo ro moof ye.

¹⁹ Jõ soh-soh k'anun tawe skabuk *Tuhan* re kbe jõ thah te fohh tama to k'anun.

²⁰ Allah tait yno re anu bhau bhaf tnok: Tiwya *Tuhan* Yesus yajat, tna mees rAit mno bosiro tna matak. Bosireto meen mhau tu mammo snok mam hame wajin. Tna Allah yno Yesus yrok yasen. Tna Ait yamo Raa ro yase ro kmot anu. Ait kmot anu kaket mnan fi raa ro ja kmot *domba* wait.

²¹ Jõ skabuk Allah re Ait yoo bo ro moof yee k'anun: Yisoh anu afo re anu nhar bo, tna re anu nta re kbe nno bo ro Ait yawe. Jõ skabuk re yno anu nhau nhaf sau, srau sau su nsya Yesus. Kbe yisoh anu, re kbe bno bombra ro Ait ksoh. Re kbe Ait yhaf mnan. Tna jõ skabuk re kbe raa bibi *Tuhan* Yesus yase rAit mammo snok mam hame wajin. *Amin*: Mabo oh!

²² Taja, tme, tao, tano na; jõ tawe anu nri watum ro jõ tkom mam aam ro mabuf refo.

²³ Anu bfoh ranu, Timotius; tii raa tufrok ait mbam *bui* mato oh. Soh ait yama't befo fooh to, kbe amu mbewok nma su no k'anu.

²⁴ Nmah meen ajõ k'raa wanu ro mase, tna msya raa ro Allah wAit beta ye. Raa wanu ro mhau mam rabin ro Italia to mmah meen k'anu.

²⁵ Jõ skabuk *Tuhan* afo re Ait yatmof anu beta.

**Watum ro Tuhan Bosi ro Tna
Mai Brat: Watum ro Tuhan Bosi ro Tna (New
Testament+)**

copyright © 2005 Wycliffe Bible Translators, Inc.

Language: Mai Brat

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

71146407-c883-5cc1-b1e8-017c229bf3fa